

# Ca tisa gue Jesús utixxi'ia Juan

El Evangelio según  
San Juan

en el  
Zapoteco de Aloápam



**La Liga Bíblica**

*Las Sagradas Escrituras para Todos*

La ilustración en la página 52 por Horace Knowles es propiedad de  
©The British & Foreign Bible Society, 1954, 1967, 1972.

Las demás ilustraciones por Louise Bass son propiedad de  
©The British & Foreign Bible Society, 1994.

Primera edición 2001

Versión electrónica  
**San Juan**  
Zapoteco de Aloápam  
zaq

©La Liga Bíblica, A.C., 2005  
México, D.F.

## Aclaraciones sobre el alfabeto zapoteco

La mayoría de las letras con las cuales se escribe el idioma zapoteco son las mismas letras con las que se escribe el español, pero ha sido necesario añadir otras letras para simbolizar todos los sonidos del zapoteco.

Las consonantes fuertes:

nn	binni	pájaro
tt	sitta	huevo
lh	belha	culebra
xx	yexxa	red
yy	iyya	piedra

Otras consonantes con sonidos que no se encuentran en español:

ts	sitsi	metate
dh	yedhu	olla
x	mixi	gato

Las vocales quebradas:

a'a	ta'a	petate
e'e	re'e	cántaro
i'i	lisi'i	calor
o'o	yo'o	casa
u'u	bedu'uni	cervato

Las vocales largas:

aa	daa	frijoles
ee	mee	columpio
ii	biia	nopal
oo	yoo	río
uu	tuu	mecate

Las vocales subrayadas, que representan ciertos pronombres dependientes:

<u>a</u>	nag <u>a</u>	mi oreja
<u>e</u>	lhuse <u>e</u>	su lengua (de él)

Note como se escriben las siguientes palabras para no confundirlas con otras que se escriben con las mismas consonantes y vocales.

lá	nombre	}	la	mismo
lä	no		na	allí
laa	confirmación		nu	sustantivador
ná	mano		sa	todavía
nú	quién		lhe	y
sá	día			
lhé	algunos			

# Ca tisa gue Jesús utixxi'ia Juan

Benni anque tisa beaque benni attiba ri'i

**1** <sup>1</sup> Atti deobali cue yies lo yu-ni nna chila do benni anque tisa. Benni anque tisa nna len Tata Dios ba doe, la tisa ba benniha anca Tata Dios. <sup>2</sup> Labē benniha doe len Tata Dios atti deobali cue yies lo yu-ni. <sup>3</sup> Len benni anque tisa beni Tata Dios iyá xea nu se'e. Ttirca lä benni anca tisa nna ni ttu nu se'e bittu ucana. <sup>4</sup> Leni benni anque tisa te elha nabani. Elha nabaniha nna anque xiani gue Tata Dios ridí ca benni se'e yies lo yu-ni. <sup>5</sup> Xianiha nna rigu'ue xiani atta anca chulha, chulhaha nna laga udána udheana lo xianiha.

<sup>6</sup> Tata Dios udhelhe yies lo yu-ni ttu unbiyuu labi Juan. <sup>7</sup> Bi'iniha bitabi utixxi'iabi gue xianiha, qui iyá xea benni tsia lecani benni anca xianiha. <sup>8</sup> Laga Juan anca xiani, suna bitaba bi'iniha utixxi'iabi gue benni anca xianiha. <sup>9</sup> Benni gualíga anca xiani rudani lhe'e alma gue iyá xea benni chi deē yies lo yu-ni.

<sup>10</sup> Yies lo yu-ni ba chi doe. Len labē beni Tata Dios yies lo yu-ni, ttiaca ca benni se'e yies lo yu-ni nna laga beon biacana benniha. <sup>11</sup> Len benni guebē bisie, lacana nna laga belabicana benniha. <sup>12</sup> Ttiaca iyába ca benni ca nu belabicana benniha lhe güia lecanie lhe, leē nna benie gapacana derechu acacana xi'ini Tata Dios. <sup>13</sup> Utta derechu guecani ucacana xi'ini Tata Dios, laga anía ancacana ulcana, niguaba ca tata nan guecani uca lecani lhe, ucacana xi'ini Tata Dios cumu leē nna aníaba uca leē.

<sup>14</sup> La tisa ba benniha beaque benni, udoe len ri'i. De nu guate benniha, besi'in Tata Dios ri, rule'enie ri nu gualí lhe. Begüiari elha ra xxen le gueē bete Tata Dios de tturbē anca xi'inie. <sup>15</sup> Juan nna utixxi'iabi gue benniha atti unnebi rabi:

—Gue ben-ni nua rinnea atti ria: “Benni isia dequi de neti nna benniha anque benni ra xxeniru leē atti neti, cumu primerla benniha chi doe atti antisla dhoa.”

16 De chi anque benni te iyá gue nna iyábari chi uxíri lhe ridír ri lhe adí elha tsee ruteę len ri'i. 17 Cumu ca tisa rinnabia gue Tata Dios nna Moisés ba betebi benniha len ri'i. Ttiaca elha si'i le gue Tata Dios lhe nu anca gualí lhe, Jesús benni anque Cristu bele'e loe nua len ri'i. 18 Tsa laga nu chi bilenna Tata Dios. Benni anque tturbeę xi'inie, ancagüę Dios, doe cuitta tata gue, leę bele'e loe gaxasná anca benniha leni ri'i.

### Juan bi'ini rugadi inda, rixxi'iabi gue Jesús

19 Aní becabi Juan gue ca bixxudi lhe gue ca benni datia Leví runcana sina gue yotu udhelha ca nu lo guetu, ca nu israelita. Cunní nna lhe'e yiesi Jerusalén li udácana diacana güennaba tisa Juan rácan bi:

—Lu nna ¿núna ancalu?

20 Bi'iniha nna laga bi bedhea lebi, utixxi'iababi nu ancaba. Labi nna rabi cana:

—Laga neti nua Cristu benni chi ga'anani Tata Dios isia odileę ri.

21 Lacana nna bedennaba tisa dacabacana bi'iniha redeácan bi:



—¿Núla ancalu ganna? ¿Si lu nua Elías bi'ini unne ca tisa bete Tata Dios?

Juan nna rabi:

—¡Dica!

Nianna redeácan bi:

—¿Si lu ba nua benni rinne ca tisa rute Tata Dios chi ga'ana isia aca?

Labi nna becabibi rabi:

—¡Dica!

**22** Lacana nna redeácan bi:

—¿Núla ancalu gannaxa? Qui anáchu quixxi'ientu ca nu udhelhacana ri'itu. Lu nna ¿nula ralu ancalu?

**23** Labi nna rabi:

—Neti anca ttu benni requi ribesi'ia lo yu bisi rinnea ria attiba ra Isaías bi'ini unne ca tisa betee Tata Dios: “Lhatsiru gualodú lele attiba ttu neda relixxa-na qui chi se'e tsele esále benni bananie ri gansi chi bisie.”

**24** Ca nu güia güennaba tisaha nna ancacana benni sela ca nu te lacani fariseo. **25** Lacana nna unnaba tisa ttebacan bi:

—¿Biacala nna rugadilu benni inda gansi läba lu nua Cristuha, bittu guaba lu nua Elías lhe lä ancagualu benni rinne ca tisa rute Tata Dios lhe?

**26** Juan nna becabibi guecani rabi cana:

—Neti nna suna indaba rugadi neti, ttiaca lagüi guebale requi ttu benni bittu anca bienle. **27** Benniha nua da dequi de neti. Neti nna nibala bi elha ralhã idhasia lo guaracha guee.

**28** Unní uca lo yu gue Betania, nu re ttu ladu gue yoo Jordán atta rugadi Juan ca benni inda.

### Jesús anque carne'e udhelha Tata Dios

**29** Betteyú sá nna bilani Juan Jesús dee atta dubiha, nianna rabi:

—¡Gualgüiarga! Ni benni anque carne'e udhelha Tata Dios cue ca tulha gue ca benni se'e yies lo yu-ni. **30** Gue ben-ni nua rixxi'iatia le atti ria: “Benni da dequi de neti nna anque benni ra xxeniru lee atti neti. Cumu anque benni udo primeru atti neti.” **31** Ni neti bittu yua nuxa anque lania. Qui un biaba ca benni israelita-na nuxa anque, nuarca delhã rugadia cana inda.

32 Utixxi'ia guaba Juan rabi:

—Bilátia Espíritu gue Tata Dios dee guadie iyyabáha attiba guadi ttu becha bisie udoe iqui benniha. 33 Neti nna laga chi yua nuxa anque lania, ttiaca benni udhelhe neti ugadia benni inda nna ree neti: “Benni ilenlu chadi Espíritu quia dhoe iquie nna benniha nua unie isia Espíritu quia leni ca benni.” 34 Neti nna chi bilátie. Nuarcala rixxi'iaya ria: Lee nua xi'ini Tata Dios.

**Ca bi'in-ni uca ca benni primeru bedheti nu bele'e Jesús**

35 Betteyú sá nna niaba dedhú Juan len chupa ca bi'ini rudheti nu rule'ebiha. 36 Atti bilani Juan ute Jesús atta se'ecabiha nna ra ttebabi:

—¡Gualgüiarga! Ni benni anque carne'e udhelha Tata Dios dia na.

37 Irupaba ca bi'ini rudheti nu rule'ebi se'e lenbi nia, atti bienquinbi nu ra Juan nna dia ttebacabi denocabi benniha.

38 Jesús nna bodequi tteba loe, atti bilanie ca bi'iniha denocabi nna unnaba tisa ttebe ca bi'iniha ree cabi:

—¿Bi reguilale?

Ca bi'iniha nna becacabi rácabi:

—Rabí, ¿gala dolu? (Tisa “rabí” dienna innána maestru.)

39 Jesús nna becabie ree:

—Gualtá gualgüia.

Lacabi nna güia ttebacabi guagüiacabi atta doe. Attiba retin ttapa nua. Niaba use'ecabi len benniha itúba ulhaha.

40 Andrés betsi Simoni bi'ini láguaba Betu, bi'iniha nua ttu ca nu chupa bienini ca tisa gue Juan, dia deno Jesús.

41 Andrés nna primer tteba betsibi Simoni guatilabi, nianna rabi bi'iniha:

—Guatti'iabatu Mesías. (“Mesías” ancana tisa hebreo dienna innána Cristu len tisa griegu, delába benni chi ga'anani Tata Dios odilee ca benni.)

42 Andrés nna uche ttebabi Simoni atta du Jesús. Atti bilani Jesús bi'iniha nna ra ttebe:

—Lu nua lá Simoni xi'ini Juan. Nnanna nna Sefas ba gatta lálu. (Sefas ancana tisa arameo dienna innána Betu leni tisa griegu.)

### Jesús uxie Lipi leni Natanael

43 Betteyú sá nna bebequi le Jesús tsie daca lo yu te lani Galilea. Nia nua guatti'ie Lipi, atti ra ttebe bi'iniha:

—Utá betteno neti.

44 Lipi nna beaca lasbi yiesi te lani Betsaida, attaguaba beaca lasi Andrés lenbi Betu. 45 Lipi nna güia ttebabi guatilabi Natanael, nianna rabi bi'iniha:

—Chi guatti'iatu benni rixxi'ia Moisés guee lo ca tisa rinnabia-na, gue benniha gua nua beni ca benni unne ca tisa bete Tata Dios lo sitsi lhe. Benniha anque Jesús xi'ini José bi'ini beaca lasbi lhe'esi te lani Nazaret.

46 Natanael nna rabi:

—¿Si güiria tsa ttu benni tse lhe'esi Nazaret?

Lipi nna rabi:

—Utárga begüia xa.

47 Atti bilani Jesús Natanael chi dabi ribigabi gaxxaba atta due nna, ra ttebe:

—Benni da ni nna gualíga ancana benni israelita, lana nna bittu run leni.

48 Natanael nna rabi:

—¿Tti uca ben bialu neti?

Jesús nna becabie ree:

—Atti antisla gaxi Lipi-n lu, neti nna chi bilátia lu atti dolu xan ya higuha.

49 Natanael nna becabibi rabi benniha:

—Maestru, lu ancalu xi'ini Tata Dios, luguaba benniha anca nu innabia ri'itu ca benni datia Israel-ni lhe.

50 Jesús nna becabie ree:

—¿Si de rpea lu bilátia lu dolu xan yaga gue higuha nna ria lelu? Xxenirla anca nu chi ilenlu.

51 Ráguaba Jesús:

—Neti gualíbatia ria le, lebi'i nna ilenle iyyabáha du yalie. Iláguabinle ca ingeli gue Tata Dios chadique lhe eyopique lhe xequia, neti benni unbiyuu da iyyabáha.

### Jesús güie atta betsá ná ca benni lhe'esi te lani Caná

**2** 1 Beyonna ubisa nna uca ttu laní betsá ná ca benni lhe'esi te lani Caná. Unnua nna rena lo yu te lani Galilea. Niaguaba du nan gue Jesús. 2 Jesús nna uxuacane tsie atta

utsá nácaniha lenie ca bi'ini rudheti nu rule'e. <sup>3</sup> Atti chi bebisi vinuha nna unne tteba nan gue Jesús rabi:

—Larga birua vinu te gue cunni.

<sup>4</sup> Jesús nna becabie ree:

—Nuila, ¿biaca neti ralu aná? Laga chi bisia sá ule'etia le neti anca benni ra xxeni lee.

<sup>5</sup> Nan guęha nna ra ttebabi ca nu bese'e aca mandadu gue laníha:

—¡Gualuni iyába nu inná ben-ni!

<sup>6</sup> Nia se'e xxupa re'e ancacana leni iyya, rita'a attiba ttu gayua litru inda lhe'e ttuttucana. Lhe'e ca unnua nua riga'atu, ca benni israelita, inda rixuintu qui reacatu nu nari lo Tata Dios, aníaba labitu runtu. <sup>7</sup> Jesús nna ree ca benni bese'e aca mandadu gue laníha:

—Gualodisá ca re'e-na inda.

Lacana nna bodisá ttittican ca nua inda. <sup>8</sup> Jesús nna redee cana:

—Nnanna nna gualcua saro'o gualsagüe nu anca sola-na.

Lacana nna aníaba bencana. <sup>9</sup> Solaha nna bennixxi ttebana inda beaca vinuha, ttiaca ni lä yuna ga guaxxi ca nua vinuha. Suntterba ca benni bese'e aca mandadu gue laníha yucana, cumu laxacana uta'acana inda lhe'e ca re'eha. Larcala nna uxi tteba solaha unbiyuu rutsá nániha. <sup>10</sup> Nianna rana nua:

—Iyába ca benni runi loesi laní-ni nna de'eaxa vinu anca tseruha rudácana. Dequi de liba chi u'uya xxatta ca nu dia laníha nna lanialiba rudácana vinu bittu tte anca tseha. Ttiaca lu nna nnannaliba chi rudábalu vinu tsee.

<sup>11</sup> Unníba primer milagru beni Jesús lhe'esi Caná nu re lo yu te lani Galilea. Aníaliba nna bele'e loe anque benni ra xxeni leni. Ri'itu ca bi'ini rudheti nu rule'e nna güia letu guee.

<sup>12</sup> Dequi de unnua nna dia ttebe lhe'esi Capernaúm lenie nan guęha lhe ca betsie lhe ri'itu ca bi'ini rudheti nu rule'e lhe. Niaba use'etu ttu chupa ubisa.

### **Jesús bebequie ca benni se'e güetto'o leli'ia gue yotuha**

<sup>13</sup> De chi da ribiga laní guetu, ca benni israelita, nu te lani pascua atti rado attu ida bodilá Tata Dios ca benniola guetuha lo ná ca nu Egiptuha, Jesús nna dia ttebe lhe'e yiesi nu te lani Jerusalén. <sup>14</sup> Lhe'e li'ia gue yotuha guatti'ie ca nu rutto'o u'una, carne'e lhe becha lhe niaguaba sia ca nu retsila belhi lhe.



15 Jesús nna ulu'u xicua ttebẽ ttu tuu. Leni unnua nna bebea ttebẽ iyácana leli'ia gue yotuha lencana ca u'una guecaniha lhe ca carne'e guecaniha lhe. Ca nu retsila belhiha nna bedhi ttebẽ ca belhi guecaniha, atti berixxi lo ttebẽ ca mexa guecaniha lhe. 16 Ca nu rutto'o bechaha nna rẽe cana:

—¡Gualebea cunna nii! Bittu unle lisi tata quia yo'o raza i'iya lhe'eni.

17 Ri'itu ca bi'ini rudheti nu rule'e nna bexxa tteba letu nu ra lo ca tisa gue Tata Dios: “Tata, de yatterba nu runia gue yo'o guelhi nna runna uyúa elha disa.”

18 Ca nu anca nu lo guetu, ca benni israelita, se'e nia nna rácana:

—Bele'en ri'itu ttu nu uni ule'e lo dequi gualí te derechu guelu unlu aná.

19 Jesús nna becabie rẽe cana:

—Gualuttapa yotu-ni, neti nna lhe'e tsunna ubisa ba nna elhidh̃a na attu libe.

20 Ca nu lo guetuha nna rácana:

—Chua yu'u xxupa (46) ida bisá ca benni bedocabi yotu-ni, lu nna ralu dequi lhe'e tsunna ubisa ba elhidhalu na attu libe.

21 Ttiaca Jesús nna laga gue yotuha ga nua rinnee, gue cuerpu guebẽ nua rinnee. 22 Larcala nna dequi de beacani

Jesús berie lhe'e baa atta yu'u ca nu yatti-na nna ca bi'ini rudheti nu rule'e nna bexxa tteba lecabi nu chi ra benniha, lania nna güia lecabi nu ra benniha lhe nu ra lo ca sitsi gue Tata Dios lhe.

<sup>23</sup> Ttu requiru Jesús lhe'e yiesi Jerusalén laní lá pascua ixeru benni güia lecani benniha de biláquinna ca milagru runie. <sup>24</sup> Ttiaca Jesús nna laga ria lee guecani dequi gualíquinna, cumu chiba yu xeabe atti du lecani. <sup>25</sup> Laga bi reasanie nuxa quixxi'iennē gaxasná du le ca benni, cumu lee nna chiba yu xeabe gaxasná anca lhe'e alma gue ca benni.

### Jesús rinnee len Nicodemu

**3** <sup>1</sup> Udo ttu benni ancana fariseo lana Nicodemu. Ancana ttu benni lo guetu, ca benni israelita. <sup>2</sup> Unnua nna güiana ttu lo rela guannalhina Jesús, nianna rana benniha:

—Maestru, ri'itu yutu nna Tata Dios ba udhelhe lu qui ule'enlu ri'itu, cumu ni ttu benni bittu aca gueni unna ca milagru runlu-na gansi bittuba du Tata Dios lenna.

<sup>3</sup> Jesús nna becabie ree na:

—Neti nna gualíbatia rpea lu, benni bittu ba galina attu libe nna laga aca ga'a nua atta rinnabia Tata Dios.

<sup>4</sup> Nicodemu nna ranē:

—¿Gasná un ttu benni chi anca yaxxu galina attu libe? ¿Si guacaba gue nua eta'ana lhe'e nan gueniha qui galna attu libe?

<sup>5</sup> Jesús nna becabie ree na:

—Neti nna gualíbatia ria lu, benni bittu galina attu libe leni inda nna Espíritu nna laga aca ga'a nua atta rinnabia Tata Dios. <sup>6</sup> Benni rali yies lo yu-ni nna, xi'ini ca benni se'e yies lo yu-ni ba anca nua; benni anca xi'ini Tata Dios nna Espíritu gue benniha ba benie nua xi'inie. <sup>7</sup> Bittu aca guatenlu de biaca rpea lu: “Raca duelha galile attu libe.” <sup>8</sup> Be-na nna gatti ladu ba ririana, lu nna masquiba gua rieninlu tsi'ini, ttiaca laga yulu ga ladu dana lhe ga ladu diana lhe. Aná runi Espíritu gue Tata Dios lhe'e alma gue ca benni rali attu libe.

<sup>9</sup> Nicodemu nna becabina rana:

—¿Gasná aca nu rálha?

<sup>10</sup> Jesús nna becabie ree na:

—Lu ancalu maestru gue ca benni israelita-na ¿si bittuba rite denlu nu ria-ni? <sup>11</sup> Neti nna gualíbatia ria lu, ri'itu nna rinnebatu gue nu chi yutu, rixxi'iabatu gue nu chi bilentu lhe,

ttiaca lebi'i nna laga ria lele gue nu ratu le. **12** Inqui gue nu anca gue yies lo yu-ni ba rixxi'iatia le nna bittu ria lele, ¿gasná tsia lele gue nu anca gue iyyabáha gansi quixxi'iatia le? **13** Tsa laga nu benni chi gopi iyyabáha qui quixxi'iana nu anca gue nia, sunruba neti benni unbiyuu da iyyabáha raca quia quixxi'iaya nu anca gue iyyabáha. **14** Attiba beni Moisés lo yu bisiha, ulhidhabi ttu yaga xua belha ancana leni bronze loni, anáguaba neti unbiyuu da iyyabáha raca duelha ilhidhacana neti güetsaa, **15** qui anáchu nna iyába ca benni tsia lecani neti nna gatta elha nabani guecani ttu dia lii.

**16** 'Tata Dios nna raca juisianie gue ca benni, de nuha la nna udhelhe yies lo yu-ni neti Xi'inie benni tturbá donie, qui anáchu nna iyába ca benni tsia lecani neti nna bittu tsia nitticana, sinuqui gatta elha nabani guecani ttu dia líba iyyabáha. **17** Cumu Tata Dios nna laga udhelha benniha neti Xi'inie qui unia tsia nitti ca benni se'e yies lo yu-ni, udhelhabe neti qui odiláya cana.

**18** 'Benni ria leni neti Xi'ini Tata Dios nna laga tsia nitti nua; ttiaca nu bittu ria leniha nna dia nittiba nua, de bittu güia leni neti benni anca tturbá Xi'ini Tata Dios. **19** Chi dia nitticana cumu neti benni anca xianiha nna chiba bitá yies lo yu-ni, lacana nna de runcana nu lä anca tse nna nuarca ucarlaquinna gue atta chulha attichula xianiha. **20** Iyába ca nu runi nu lä anca tse bittu raca uyúcana xianiha, laga ribigacana atta ru'u xianiha qui bittu tsanni lo nu runcana nianna itisacana. **21** Ttiaca benni runi nu ra Tata Dios anca gualí nna gua ribigaba ca nuha atta yu'u xianiha qui ilaa lacana nna runbacana nu tsee de du Tata Dios len lacana.

### **Juan bi'ini rugadi inda rixxi'iabi gue Jesús**

**22** Dequi de lania nna güia tteba Jesús lenie ri'itu ca bi'ini rudheti nu rule'e lo yu te lani Judea, niaba bisee lentu, rugadi guabe benni inda lhe. **23** Anáguaba Juan rugadiguabi benni inda daca lo yu gue Enón nu re gaxxaba Salím, cumu nia yu'u xxatta inda. Nia ria ca benni radicana inda. **24** Juan nna laga chi te bi'iniha lisiyya lania. **25** Ttu lhé ca benni rudheti nu rule'e Juan nna bitilha tisacabi len adí ca benni guetu anca benni israelita lo ni'ia gue bi nua riguarna nu tsiga ancari lo Tata Dios reonna ri benni nari loe.

26 Ca unnua nna güia ttebacana guayúcana Juan rácan bi:

—Maestru, benni udú lenlu daca attu ladu gue ro'lo yoo Jordán, nu utixxi'iaguabalu gueniha, nnanna nna rugadi guabana benni inda. Iyába benni diacana lenna.

27 Juan nna becabibi rabi:

—Ni ttu benni bittu aca gueni unna ttu bixa gansi läba Tata do iyyabáha aca lenie na qui unna nua. 28 Lebi'i nna gua rienbinle ria, laga neti nua Cristu, suntterba anca ttu benni neru udhelha Tata Dios rixxi'ia dequi chi da Cristu. 29 Attiba ttu atta rutsá nácani, unbiyuu utsá náníha liba nua dhina nuila. Unbiyuu raca ruyú tse loesni leni unbiyuu utsá náníha du gaxxaba nia nna, re'eo juisia leni rieninna rinne nua. De nuala nna neti nna re'eo juisia lasia cumu neti anca nu ruyú tse loesni leni Jesús-na. 30 Larcala nna raca duelha tsopi ben-na aque benni ra xxeni leni, neti nna eyadi ga lasia eyaca nu bittu ra xxeni leni.


31 'Ben-na deę iyyabáha. Lee anque benni ra xxeni leni gue delo iyába. Benni anca gue yies lo yu-ni nna sun tteba gue yies lo yu-ni anca nua, nu anca gue yies lo yu-ni ba rinnena. Ttiaca benni da güetsaa nna benniha anque benni ra xxeni leni gue delo iyába. 32 Gue nu bilábanie lhe nu bienbanie lhe rixxi'ie; ttiaca laga nu ria leni gueę. 33 Ca benni ria lecani gue nu reę nna leni unnua rule'e locana dequi gualíba nu ra Tata Dios. 34 Ben-na udhelha Tata Dios, ca tisa gue benniha ba rinnee, cumu Tata Dios nna itú iqui itú lee betee Espíritu gueę len ben-na. 35 Tata Dios nna raca juisien benniha gue Xi'inie-na, larcala nna iyába nu te chi boca'ane las ná ben-na 36 Nu ria leni gue Xi'inie-na nna gua te ba elha nabani ttu dia lii gueni; nu bittuba tsia leni ben-na nna laga bi elha nabani gue nua te ttu dia lii. Unnua nna elha disa lä yu'ubia ute Tata Dios ba ralha nua dhina.

**Jesús rinnee len ttu nuila beaca lasni lo yu te lani Samaria**

**4** 1 Ca benni fariseo nna chi binacana dequi ixeru benni chi denoo Jesús, ixerguaba benni rugadie inda atti Juan lhe. 2 (Masquiba laga Jesús ga rugadie ca nua inda, ri'itu ca bi'ini rudheti nu rule'e liba rugadi inda.) 3 Atti bine nua nna bedá ttebe lo yu te lani Judea deyye lo yu te lani Galilea attu libe.

4 Atti deyyeha nna labiaba betee lo yu te lani Samaria.

5 De nuala nna bisine lhe'e ttu lhe'esi re lo yu te lani Samaria,



unnua nua te lani Sicar rena gaxxaba ro'o yu gue Jacob nu begüebi xi'inbi José. <sup>6</sup> Nia nua re posu inda nu te lani posu gue Jacob. Tu deoba tsi'inuha liba bisina Jesús nia. Lee nna biachu ttebe uree ro'o posuha bedí leg, cumu chi ránie de chi bedábe. <sup>7</sup> Nia bisina ttu nuila gue Samaria ro'o posuha diana güelhequi inda. Jesús nna ra ttebe nuilaha:

—Bete saro'o inda i'iyá.

<sup>8</sup> Ri'itu ca bi'ini rudheti nu rule'e Jesús nna lhe'esiba ba diatu güeyo'o nu gotu. <sup>9</sup> Nuila gue Samariaha nna becabina rané:

—Lu nna benni israelita balu, ¿gasná rinnabalu inda len neti? Gua yubalu nna benni Samaria ba neti.

(Anía ra nuilaha, cumu ri'itu benni israelita lentu ca benni gue Samaria nna laga raca uyú loestu.) <sup>10</sup> Jesús nna becabie gueni ree na:

—Ganruba ttrca yulu gue nu tsee rute Tata Dios, gue nú benni unní rinnabe lu inda lhe, lu nna innabalu lenie, lee nna utee inda rute elha nabani i'iyalu.

<sup>11</sup> Nuilaha nna rané:

—Tata, inqui laga bi denlu bixa leni cuealu inda nna, posu-ni nna axta lhi'iu dionna. ¿Gala saxxílu inda ralu runna elha nabani-na ganna? <sup>12</sup> ¿Si xxenrula ra lelu atti benniola gueri Jacob? Lee boca'ane posu-ni len ri'itu. Lhe'eonni u'uye inda, ca xi'inbiha lhe ca nimala guebiha lhe.

13 Jesús nna becabie ree na:

—Iyába ca benni ri'iya inda-ni nna rebisi dacaba ca nua attu libe. 14 Ttiaca benni i'iya inda utea-ni nna tsa larga ga ebis nua attu libe. Cumu inda utea i'iyana nna aque lhi'iu lhe'eni attiba ttu ro'o dina riria inda. Benniha nna utee elha nabani gatta ttu dia lii gueni.

15 Nuilaha nna becabina ranee:

—Tata, benna loesi indaha i'iyá qui bitturu ebisia attu libe, lä itarguaba nii ubea inda lhe.

16 Jesús nna ree na:

—Beyya gualisa unbiyuu gueluha nna utá lenna nii.

17 Nuilaha nna becabina rana:

—Laga nu unbiyuu qui neti te.

Jesús nna ree na:

—Gualíbinlu ralu dequi laga nu unbiyuu guelu do.

18 Cumu gayu unbiyuu chi udo len lu. Nu do len lu nnanna nna laga unbiyuu guelu nna, larca gualíba nu rálha.

19 Nuilaha nna ranee:

—Neti nna racatia lu ancalu ttu benni rinne ca tisa rute Tata Dios. 20 Ca benniola guetu use'eha nna iqui i'iya-ni ba bitacabi bedú xibicabi lo Tata Dios. Lebi'i nu israelita nna rale dequi lhe'e yiesi Jerusalén anca atta chi ga'ana udú xibi ca benni lo Tata Dios.

21 Jesús nna ree nuilaha:

—Güia lelu nu ria-ni. Chi isia sá atti ni iqui i'iya-ni lhe ni Jerusalén-na lhe lä udú xibile lo Tata Dios. 22 Lebi'i nna laga yule nuxa rudú xibile loni, ri'itu nna gua yubatu nuxa anca benni rudú xibitu loe. Cumu lhe'e yiesi guetu, ca benni israelita, iria benni odilee ca benni qui bittu tsia nitticana.

23 Ttiaca chi isia uraha, nnannargua nua nna chi bisia ura atti udú xibi ca benni gualígaquinna rudú xibicani lo Tata Dios attiba ga'ana uncana lhe attiba raca le Espíritu gué lhe. Lee nna rilee ca loesi lacana qui udú xibicani loe. 24 Tata Dios anque espíritu, larcala nna ca benni rudú xibicani loe nna raca duélha uncan nua attiba ga'ana uncana, attiba raca le Espíritu gué lhe.

25 Nuilaha nna ranee:

—Neti yua nna isia Mesías (benni lá Cristu). Gansi chi bisia benniha nna quixxi'ianie ri'itu iyába.

26 Jesús nna becabie ree na:

—Neti nua benni rálha. Neti unní rinnea len lu.

27 Lania nna chi besintu, ri'itu ca bi'ini rudheti nu rule'e Jesús, rebanbintu bilentu benniha rinnee leni ttu nuila, ttiaca ni ttutu bittu beaxintu gatu Jesús: ¿Biunna raca leonna? o ¿Bi gueonna rinne lenlu nuila-na? 28 Nuilaha nna bedú bixxina re'e gueniha nia nna deyyana lhe'esiha guagunana ca benni, ran cana:

29 —Gualtárga gualgüia. Ni ttu unbiyuu du ni chi utixxi'ienna neti iyába nu chi benia. ¿Si läba unníba nua Cristu benni chi ga'anani Tata Dios odilee ca benni?

30 Laniala nna biría ca benni se'e lhe'esiha diacana atta du Jesús. 31 Laca ri'itu ca bi'ini rudheti nu rule'e nna ratue:

—Maestru, uto chi ladiba saro'o.

32 Lee nna ree ri'itu:

—Neti nna te ttu elha go quia roa nu bittu anca bienle.

33 Ri'itu ca bi'ini rudheti nu rule'e Jesús nna udulo ttebatu ra loestu:

—¿Si nuxaba chi betteca'ana nu utoe aca?

34 Jesús nna ree ri'itu:

—Elha go quia nna ancana, unia nu raca le benni udhelhe neti, ulhuxa sina gue-ni. 35 Lebi'i nna gaxa gua rábale: “Sna reasaba a ttpa beo isia güitsela.” Neti nna ria le: Gualodequi lole gualugüia ca xua xuxtila se'e na, chiba rigatsicana qui erúcana. 36 Benni ribeni güitsela nna ridíba nua lhiaxa-ni. Lena bani redínaha nna ancana ca benni chi uxí elha nabani, qui anáchu nna benni rudelha xua lhe benni rechú xua lhe ttulapaba edaca lecani. 37 Ni raxxína tisa nu ra: “Yaba le benni bedelha xua nna yaba le benni bechú xua.” 38 Neti nna ridhelha le echúle xua bedelha attu benni subi nu bittu lebi'i guatele bedelhale. Nnanna nna lebi'iba ribe xenle gue sina guecani.

39 Ixeru ca benni se'e lhe'esi re lo yu te lani Samaria güia lecani Jesús atti ra nuilaha cana: “Chi utixxi'ienie neti iyába nu chi benia.” 40 Larcala nna atti bisina ca benni gue Samaria atta du Jesús nna, unnaba ttebacana loe eya'ané nia. Lee nna niaba udoe len lacana chupa ubisa. 41 Ixeru ca benni güia lecanie atti bienquinna ca tisa unne cuina ga benniha.

42 Nianna rácana nuilaha:

—Nnanna nna laga sunru de utixi'ienlu ri'itu nu raluha nna ria letu. Ria letu nnanna cumu ri'igatu chi bienintu nu ree. De

unnua nna chi yutu gualíba ben-niba nua anque benni odilee ca benni se'e yies lo yu-ni.

**Jesús beonie xi'in biyuu ttu nu ra xxeni  
leni runi sina gue nu rinnabia**

43 Dequi de ute chupa ubisa nna, beria tteba Jesús lhe'e yiesi Samaria die daca lo yu te lani Galilea. 44 Cuinaba lee nna ree: “Ttu benni rinne ca tisa rute Tata Dios nna laga ria lecani bi'iniha lo yu guebi.” 45 Atti bisine Galilea nna tseba beni ca benni se'e nia lenbi, de chi biláquinna iyába nu beni benniha lhe'e yiesi Jerusalén atti raca laní nu te lani pascua atti rado attu ida bodilá Tata Dios ca benniola guetuha lo ná ca nu Egiptuha, cumu lacana nna güia guabacana laní.

46 Jesús nna besin dacabe lhe'esi Caná nu re lo yu te lani Galilea atta beonie indaha vinu. Nia do ttu nu ra xxeni leni runi sina gue nu rinnabia. Unnua nna do ttu xi'inbiyúni lhe'esi Capernaúm ranina. 47 Atti bieninna chi dedá Jesús lo yu te lani Judea qui esie Galilea, güia ttebana guannabana lo benniha tsie lhe'e yo'o gueniha qui eyonie xi'inniha, cumu chi ratti nua tena ranina. 48 Jesús nna ree na:

—Lebi'i nna gansi bittuba ilenle aca ttu milagru nu unna eban lele nna laga tsia lele.

49 Ttiaca nu ra xxeni leni runi sina gue nu rinnabiaha nna rane:

—Tata xis to, utiaxxi tsiari qui antisla gatti xi'inia.

50 Jesús nna ra ttebe na.

—Beyya lhe'e yo'o gueluha; xi'inluha nna laga gatti nua.

Unbiyúha nna güiaba leni nu ra Jesús, laniala nna deyyana. 51 Atti chi deyu'una neda deyyana esinna lhe'e yo'o gueniha nna ca nu ribeni sina gueniha nna, güia ttebacana gualedacan na rácan na:

—¡Beaca ba xi'inluha!

52 Lana nna unnaba tisa ttebana ca nua ran cana:

—¿Bi ura beaca untoha?

Ca unnua nna rácana:

—Nnaya attiba tu retin ttu beria xilhá latini.

53 Tata gue untoha nna guadú tteba leni, la ura ba nua ra Jesús na: “Laga gatti xi'inluha.” Laniala nna güia leni Jesús lenna iyába ca benni se'e lhe'e lisniha.

54 Unní berupa milagru runi Jesús dequi de bedeg lo yu te lani Judea besie lo yu te lani Galilea.

### Jesús reonie ttu unbiyuu da yatti ni'ia náni

**5** <sup>1</sup> Dequi de lania nna bisia ttu laní guetu ri'itu ca benni israelita. Jesús nna dia ttebe Jerusalén. <sup>2</sup> Lhe'e yiesi Jerusalén gaxxaba atta do ro'o puerta atta rita'a ca carne'e, nia re ttu posu inda te lani Betesda leni tisa hebreo. Sa bi'iaba posuha nna da coretori sia gayu ro'o puerta xeni gueni. <sup>3</sup> Lhe'e coretoriha te ixeru ca benni rani, nu xua loni lhe nu xi lhe nu da yatti ni'ia náni lhe ribedacana itá lo indaha. <sup>4</sup> Cumu ttu ingeli da iyyabáha nna guadú guadúba riyinnie lhe'e posuha rutte lo indaha. Benni riyúbani rita'axxi lhe'e indaha dequi de rebe si loe nna, reria tteba bixaba isagüee yu'u latini. <sup>5</sup> Nia sela ttu unbiyuu chi uca rerua yu'u xxunu ida (38) ranina. <sup>6</sup> Atti bilani Jesús nua tena nia, bine dequi isá chi uca ranina lhe, lee nna ra ttebe na:

—¿Si gua rdacalu eyacalu?

<sup>7</sup> Unbiyuu raniha nna becabina raneg:

—Xa tata, tsa laga nu teti neti qui uga'ana neti lhe'e posu-na gansi chi ritá lo inda-na. Cadaba runia ga'aya nna attu nu subila riubinna rita'ana.

<sup>8</sup> Jesús nna reeg na:

—Guadha nna bodaxxu tte nu rattalu loenna, udá tte nna.

<sup>9</sup> La ura tteba nna beaca unbiyúha, bodaxxu ttebana nu uttana loniha, udána requina nia. Ttiaca la sá-na ancana sá reaca letu, ca benni israelita. <sup>10</sup> Ca nu lo guetuha nna rácana unbiyuu beacaha:

—Nasá ancana sá reaca leri. Bittu dica eyojalu nu uttalu loen-na.

<sup>11</sup> Unbiyúha nna becabina rana:

—Cuinaba benni beonie netiha reeg neti: “Ulhidha nu uttalu loen-na nna udá tte.”

<sup>12</sup> Ca unnua nna ra ttebacan na:

—¿Nú nua ran lu: “Ulhidha nu uttalu loen-na nna udá tte”?

<sup>13</sup> Unbiyuu beacaha nna ni lä yuna nú benni nua reeg na anía, cumu Jesús nna nucala benitti lo benniha lagüi gue ca benni se'e nia. <sup>14</sup> Dequila nna guatti'ia Jesús na leli'ia gue yotuha, nianna ra ttebe na:

—Begüiarga, urga bi chi beacalu. Bittu eyequilu edeonlu ttu nu lä anca tse, qui lä satelu attu nu lä anca tse xxenru.

15 Unbiyúha nna güia ttebana guattixxi'ienna ca nu lo guetu ri'itu ca benni israelita dequi Jesús ba benniha beonie na.

### Jesús reę leę anque Xi'ini Tata Dios

16 Lo ni'ia gue unnua nna deno ca nu lo guetu ca benni israelita Jesús de runie nua sá reaca letu. 17 Ttiaca Jesús nna becabie guecani reę cana:

—Tata quia nna satiaba riben benniha sina, axtaba nasá ribenie. De nuala nna neti nna renguabá.

18 Lo ni'ia gue unnua nna ca nu lo guetu, ca benni israelita nna adíla rudona lecani utticane. Cumu laga sunru bittu rudoe tisa edí leę sá reaca letu, runguabę anque ttuba leni Tata Dios de reę raca tata gueę benniha.

19 Jesús-na becabie reę cana:

—Neti Xi'ini Tata Dios gualíbatia ria le, laga aca quia unia ttu bixa sun tteba neti. Nu rugüiabá runi Tataha nna runia. Iyába nu runi Tataha nna runia. 20 Cumu Tataha nna racanie quia neti Xi'inie-ni, de nuala nna rule'enie neti iyába nu runie. Nu xxenirla atti ca unnii chi ule'e len neti, nu unna ebanin lele gansi chi bilenle na. 21 Cumu attiba Tataha runie reacani ca nu yatti-na rotę elha nabani guecani nna aníaguaba neti Xi'inie-ni rutea elha nabani gue ca benni raca lasia utea elha nabani guecani. 22 Tataha nna laga nu benni runie elha uxtisi gueni, las nába, neti Xi'inie-ni, chi boca'ane iyá qui unia elha uxtisi. 23 Anáchu nna iyá ca benni rapacana Tataha respetu nna gapaguabacana neti Xi'inie-ni respetu. Nu bittuba rapana neti respetu nna bittu guaba rapa nua respetu Tata quia do iyyabáha. Leę udhelę neti benni ançá Xi'inie-ni.

24 'Neti nna gualíbatia ria, benni rudo nagani gue nu ria nna riaguaba leni benni udhelę neti, unnua gua te elha nabani gueni ttu dia lii, laga tsia nittina. Benni yattiba uca nua lo Tata Dios, nnanna nna yu'u elha nabani gueni loe. 25 Neti nna gualíbatia ria le chi da isia ura ria-ni; nnanna nna ura ba ben-ni chi bisia, atti iyienini ca benni anca attiba nu yatti lo Tata Dios tsi'ia, neti Xi'inie-ni, ca nu udo nagacani quia nna guaca banbacana. 26 Cumu attiba Tata quia do iyyabáha leę ruteę elha nabani, aníaguaba neti Xi'inie-ni benguabę açá benni rute elha nabani. 27 Chiguaba boca'ane

len neti qui unia elha uxtisi de anca benni unbiyuu da iyyabáha. 28 Bittu ebaninle gue nu ria-ni, cumu chi isia ura atti iyienini iyába ca nu yatti yu'u lhe'e ca baa-na tsi'ia. 29 Ca nu beni nu anca lhatsiru nna eyadhacana qui aca bancana ttu dia lii iyyabáha, ca nu beni nu lä anca tse nna eyadhacana qui tsiacana atta lexúha.

**Jesús rixxi'ie gaxasná tte dani ca benni nuxa anque**

30 'Neti nna laga aca quia unia ttu bixa sun tteba neti. Runba elha uxtisi attiba raba Tata quia neti. Elha uxtisi runia-ni nna ancana ttu elha uxtisi lhixxa, cumu neti laga reguilá unia nu ru'u lasia, runba neti nu ru'u le benni udhelhe neti. 31 Cumu gansi la netiba rixxi'iaaya gue nuxa anca nna, nu rixxi'iaaya nna laga bi daca nua. 32 Attu benni subiliba rixxi'ie nu anca quia, neti nna yua nna nu ree nna ancana nu gualí. 33 Juan utixxi'iababi nu anca gualí leni ca nu udhelhale güia güennaba tisaha. 34 Neti laga bi reasatia nuxa benni quixxi'iana quia, suna rorexxaba lele gue nu ra Juan qui lhale, bittu tsia nittile. 35 Juan nna ancabi attiba ttu gui ralhana rigu'una xiani. Lebi'i nna ttu sattirba bebe itta lele de bieninle nu rabi. 36 Ttiaca te attu nu rixxi'iarna gue nuxa anca atti nu utixxi'ia Juan, delába ca milagru runia-ni, cumu laba Tata quia do iyyabáha rutee ca ben-na len neti. La ca ben-na ba rixxi'iaque dequi gualí lee udhelhe neti. 37 Anáguaba Tata quia benni udhelhe neti, rixxi'iaguabe nuxa anca, masquiba lebi'i nna bittu chi bieninle tsi'ie, niguaba lä chi bilenle lhe. 38 Lä yu'uguaba ca tisa gue-na lhe'e alma guele lhe cumu de bittu ria lele neti benni udhelhe ni.

39 'Lebi'i nna tsitsiba rudhetile ca tisa dia lo ca sitsi gue Tata Dios, cumu ruxxen lele satti'iale loque elha nabani gatta ttu dia líba guele. Ca ben-na unná rixxi'iaque quia, 40 ttiaca lebi'i nna bittu raca lele itale len neti qui gatta elha nabani guele ttu dia lii.

41 'Neti nna laga bi reasatia nuxa innána dequi neti anca benni ra xxeni leni, 42 cumu chiba anca biatia le, gua yuxeaba lebi'i nna laga raquinle gue Tata Dios. 43 Neti nna daya cuenta gue Tata quiaha, lebi'i nna bittu raca uyúle neti. Lala tirca attu nuxa dana cuenta gue la labana nna, unnua liba raca ruyúle. 44 Gaga nua tsia lele quia, cumu la lebi'iba ra loesle

dequi ancale nu ra xxeni leni, laga runle qui Tata Dios benni tturbe do anque Dios inneq dequi ancale nu ra xxeni leni.

45 Bittu aquinle dequi neti utea parti guele lo Tata quia do iyyabáha, Moisés bi'ini xen lele gue nu unnebiha liba utebi parti guele. 46 Ttirca ria lele gue nu unne Moisés nna, tsiaguaba lele quia; cumu quia unná rixxi'ia Moisés lo ca sitsi-na. 47 Ttiaca gansi bittuba ria lele gue nu ra lo ca sitsi benbi-na, ¿gasná tsia lele gue nu rpea le-ni?

### Jesús beteq nu uto gayu mil ca unbiyuu

**6** 1 Dequi de lania nna dia tteba Jesús daca attu ladu gue ro'o indatoo gue Galilea, nu teguaba lani indatoo gue Tiberias. 2 Ixeru ca benni denocane cumu chi biláquinna ixé ca milagru runie reonie ca benni rani. 3 Jesús nna gopi ttebe lo ttu lhilhi. Niaba udoe len ri'itu ca bi'ini rudheti nu rule'e. 4 La lania guaba nua chi da ribiga laní guetu, ca benni israelita, nu te lani pascua atti rado attu ida bodilá Tata Dios ca benniola guetuha lo ná ca nu Egiptuha. 5 Atti bilani Jesús de ya de re benni denocane nna ra ttebe Lipi:

—¿Gala sayo'ori ttaxtila qui go iyá ca benni deno-ni?

6 Anía ree Lipi qui ilánie bittuca inná bi'iniha, cumu lee nna chiba yue bixa unie. 7 Lipi nna becabibi rabi:

—Gaxa niba belhiu gue chupa gayua ubisa sina lä aca ni iyo'o ttaxtila qui go ttuttu cunna sa saro'o.

8 Attu bi'ini sela ri'itu rudheti nu rule'e Jesús lá Andrés, betsi Simoni bi'ini láguaba Betu, ra ttebabi benniha:

9 —Ni ttu uncuitti du ni denna gayu ttaxtila gue cebada, a chupa belha nna, ttiaca ¿ganiunná go iyá ca benni se'e-ni?

10 Jesús nna ra ttebe:

—Gualgasi ca benni-na ebiacana.

Nianna bebia ttebacana lo ixxiha cumu attula de ixxi anca nia. Attiba tu gayu mil sun tterba ca benni unbiyú se'e len ca benni bebiaha. 11 Jesús nna bedaxxu ttebe ca ttaxtilaha. Dequi de beteq xquixaru leni Tata Dios nna utidhi ttebe benniha gue iyába ca benni se'e nia. Aníaguaba benie leni ca belhaha. Betebe nu uto iyá recha ca benni se'e nia bedá belbaquinna. 12 Dequi de chi belin ca benni nna, ra tteba Jesús ri'itu ca bi'ini rudheti nu rule'e:

—Gualottupa iyá recha ca pedasu bexxa-na, qui tsa bittu bi tsia latti.

13 Ri'itu nna bottupa ttebatu benni bexxaha. Tsi'inu sumi bisá ca pedasu bexxa gue gayu ttaxtila gue cebadaha. 14 Atti bilani ca benni milagru beni Jesús nna ra ttebacana:

—Gualíba benniba nua anque benni rinne ca tisa rute Tata Dios chi ga'ana isia yies lo yu-ni.

15 Ute dabani Jesús rdaca ca nua ehecanę la fuersa ba qui aque nu rinnabia guecani nna, dedhia ttebe ttube attu libe axta lo lhilhiha.

### Jesús rideę die lo indatoo

16 Atti chi uca ela nna, beadi ttebatu, ca bi'ini rudheti nu rule'e Jesús, ro'o indatooha, 17 gopi ttebatu lo ttu barcu qui elhátu lo indatooha esintu lhe'esi Capernaúm. Chiba uca ela nua nna Jesús nna laga nue chi besía len ri'itu. 18 Inda toha nna chi udú lí lo nua de raca ttu be idí. 19 Dequi de chi bedátu attiba tu gayu o xxupa mil metru lo indatooha nna, bilentu Jesús redeę lo inda dedeę rebigue cu'ue barcuha. Ri'itu nna usi lhabintu. 20 Lee nna ra ttebe ri'itu:

—Neti bunni. Bittu gasinle.

21 Ri'itu nna re'eo juisia letu bolhopitu benniha lo barcuha. Barcuha nna besin ttegua nua ro'o yu atta diatuha.



### Jesús anque ttaxtila rute elha nabani ttu dia lii

22 Bettyú sá nna ca benni sna se'eba ttu ladu gue indatooha nna ute dábaquinna gopi ri'itu ca bi'ini rudheti nu rule'e Jesús lo barcu nu ttu iqui iyya xuaru du nia diatu. Jesús nna laga nue gopie lhe'e nua. 23 La sá guaba nua besina ca barcu dedá daca lhe'esi Tiberias gaxxaba atta uto ca benni ttaxtila dequi de bete Benni Bananie ri'i xquixaru leni Tata Dios. 24 Atti bilani ca benni se'e nia nuttu Jesús du nia, niguaba ri'itu ca bi'ini rudheti nu rule'e lhe, gopi ttebacana lo ca barcuha diacana satilacana benniha daca Capernaúm.

25 Atti guatti'iacana Jesús attu ladu gue indatooha nna, unnaba tisa ttebacane rácane:

—Maestru, ¿nuca bisialu nii?

26 Jesús nna becabie guecani ree cana:

—Neti nna gualíbatia ria le, lebi'i reguilabale neti de betea ttaxtila utole axta qui belinle, laga reguilale neti de begüiale ca milagru runia. 27 Bittu udo xxatta lele quilale elha go nu bittu ruchia isá yies lo yu-ni. Nu unlale nna gualuni duelha gualaguila elha go nu ute elha nabani ttu dia lii guele. Elha go-ni nua utea len lebi'i, neti benni unbiyuu daya iyyabáha. De nua nna Tata quia do iyyabáha chi bodúe neti.

28 Lacana nna rácane:

—¿Galasná untu qui aca nu raca le Tata Dios aca?

29 Jesús nna becabie ree cana:

—Tsia lele neti benni udhelhe ni. Unnii raca le Tata Dios unle.

30 Lacana nna unnaba tisa ttebacana rácana:

—¿Bila milagru ule'enlu ri'itu qui ilentu nna tsia letu lu? ¿Bi raca guelu runlu? 31 Ca benniola guetu use'e atti nia nna utocana nu te lani maná udhelha Tata Dios lo yu bisi atta use'ecana, attiba ra lo ca sitsi gue-na: “Ttaxtila da iyyabáha bete Tata Dios utocana.”

32 Jesús nna ree cana:

—Neti nna gualíbatia ria le, laga Moisés nua betebi ttaxtila da iyyabáha len ca nua, Tata quia ba betee nua, nnanna nna rutee nu gualíga anca ttaxtila da iyyabáha. 33 Cumu benni guadi da iyyabáha anque ttaxtila gue Tata Dios rutee elha nabani gue ca benni se'e yies lo yu-ni.

34 Nianna rácane:

—Tata, satiaba bete loesi ttaxtila-na gotu.

35 Jesús nna ree cana:

—Neti anca ttaxtila rute elha nabani ttu dia lii. Benni itana len neti nna, tsa larga bi ttun nuha; nu tsia leni neti nna, tsa larga bi ebis nuha. 36 Ttiaca attiba chi rpea le, masquiba chi bilenle neti nna tsa laga ria lele quia. 37 Iyába ca benni rute tata quia len neti nna, guadába ca nua len neti. Ca benni da len neti nna laga odequia ca nua. 38 Cumu neti nna laga guadia iyyabáha qui unia nu raca lasia. Neti nna delha unia nu raca le Tata quia. De nuala nna udhelhe neti. 39 Unní anca nu raca le Tata quia benni udhelhe neti unia, bittu ugüelha tsia nitti ni ttu ca benni utee len neti. Nu unla nna unia eyacaquinna attu libe gansi chi bisia sá lhuxa. 40 Nu ru'u le Tata quia nna ancana, iyába ca benni odequi locani ugüiacana neti Xi'inie-ni lhe tsia lecani neti lhe gatta elha nabani guecani ttu dia lii, neti nna unia eyacaquinna attu libe gansi chi bisia sá lhuxa.

41 Lo ni'ia gue nua nna udulo ca benni quia, ca nu israelita, unnecana gue Jesús, de ree: “Neti anca ttaxtila da iyyabáha.”

42 Ra guabacana:

—Laa Jesús xi'ini José bunni nna. Ri'i nna guanca biabinri tata gueniha lhe nan gueniha lhe. ¿Biacala ronni dana iyyabáha ganna?

43 Jesús nna becabie ree:

—Bitturu innele gue nu chi ria-ni. 44 Ni ttu benni lä isiana aná tteba len neti gan läba Tata quia benni udhelhe neti unie itana. Neti nna unia eyaquinna attu libe gansi chi bisia sá lhuxa. 45 Lo ca sitsi boca'ana ca benni unne ca tisa bete Tata Dios lencabi nna ra: “Tata Dios ule'enie iyába ca benni.” Larcala nna iyába ca nu bienquinna gue Tataha lhe bideticana gue lhe dácana len neti.

46 'Laga de nuxa benni chi bilenna Tata quia do iyyabáha, sunruba neti benni delha atta doe nna chi bilátie. 47 Neti nna gualíbatia rpea le, benni ria leni neti nna gua teba elha nabani gue nua ttu dia lii. 48 Neti anca ttaxtila rute elha nabani ttu dia lii gue ca benni. 49 Ca benniola gueleha nna utocana ttu elha go te lani maná lo yu bisiha, ttiaca nna läqui ga de unnua nna bittuba utticana. 50 Neti nna rinnea gue ttaxtila da iyyabáha. Benni gona ttaxtila-ni nna tsa laga gatti nua lo Tata Dios.

51 Neti nua anca ttaxtila rute elha nabani guadi iyyabáha. Benni gona ben-ni nna aca banna ttu dia liba iyyabáha. Ttaxtila utea-ni nna anque cuinaga cuerpu quia, utea na qui ca benni se'e yies lo yu-ni nna gatta elha nabani guecani ttu dia lii.

52 Lania nna ca benni quia ca nu israelita nna udulo ttebacana bitilha tisacana rácana:

—¿Gasná uniunna utena bela gue cuerpu guen-na gori?

53 Jesús-na becabie guecani ree cana:

—Neti nna gualíbatia ria le, gansi bittuba gole bela quia-ni lhe i'iyale reni quia-ni lhe neti benni unbiyuu da iyyabáha, laga aca banle ttu dia lii. 54 Nu gona bela quia-ni lhe i'iyana reni quia-ni lhe gua teba elha nabani gueni ttu dia lii. Neti nna gunba eyaquinna attu libe ca sá da lhuxa. 55 Cumu bela quia-ni nna ancana nu gualíga anca elha go, reni quia-ni nna ancana nu gualíga anca i'ya ca benni. 56 Nu gona bela quia-ni nna i'iyana reni quia-ni nna, duna len neti, neti nna dua len lana. 57 Tata quia benni udhelhe neti nna yu'u elha nabani guee. Larcala nna neti nna yu'uguaba elha nabani quia. De nuala nna ca benni gocana bela quia nna, de netirba nna aca bancana. 58 Benni anque ttaxtila da iyyabáha, bittu anque loesi ttaxtila lá maná uto ca benniola gueri use'e atti nia. Masquiba utocana benniha nna labiaba utticana, ttiaca benni gona ttaxtila-ni nna aca banbana ttu dia lii iyyabáha.

59 Unni utixxi'ia Jesús lhe'e yo'o atta ritupa ca benni quia ca nu israelita rudheti ca tisa gue Tata Dios do lhe'esi Capernaúm.

### **Jesús anque benni rinne ca tisa rute elha nabani gue ca benni ttu dia lii**

60 Atti bienquinna nu ra Jesús nna, ixé ca nu rudheti nu rule'e rácana:

—Tsitsi anca ca tisa rule'e ben-ni. ¿Nú dhana sadú leni cunni?

61 Ute dabani Jesús rinne ca benni rudheti nu rule'e gue nu unnee nna, ra ttebe cana:

—¿Si rien díbinle ca tisa unnea-ni? 62 ¿Titaliga unle gansi ilenle neti benni unbiyuu da iyyabáha eyopia atta doa ttua?

63 Espíritu gue Tata Dios rutee elha nabani guele ttu dia lii, laga bela gue cuerpu guele-na unná rute elha nabani guele.

Ca tisa rinnea-ni nna ancaque gue Espíritu gue Tata Dios rute elha nabani gue ca benni ttu dia lii. <sup>64</sup> Ttiaca se'e ttu chupale nna bittu ria lele.

Jesús nna ree anía cumu desde primeruha li chi yue nupaxa bittu tsia lenie lhe nú nua utene las ná ca nu utticane lhe. <sup>65</sup> Ráguabe:

—De nuala nna ria le, ni ttu benni bittu aca itana nátteba len neti, gansi läba Tata quia unie ita nua len neti.

<sup>66</sup> Sná tteba lania nna, ixeru ca benni rudheti nu rule'e bequicana, bitturu güiacana sanalhacane. <sup>67</sup> Laniala nna ra Jesús ri'itu ca benni tsi'inu rule'enieha:

—Lebi'i nna ¿si racagua lele eyyale?

<sup>68</sup> Simoni bi'ini láguaba Betu nna becabibi rabi:

—Tata Xisi, ¿núrua la len nua tsiatu ganna? Sunruba lu rinnee ca tisa rute elha nabani gue ca benni ttu dia lii nna. <sup>69</sup> Ri'itu nna chi ria letu lhe chi yutu lhe lu ancalu benni do riesi chi ga'anani Tata Dios ita.

<sup>70</sup> Jesús nna becabie ree:

—Tsi'inule chi becuea, ttiaca ttule nna ancana nu du len nu xxegüiha.

<sup>71</sup> Atti ree anía nna rixxi'ie nu uni Judas xi'inbiyú Simoni Iscariote, cumu masquiba selana len ri'itu tsi'inu ca bi'ini rule'enie nna lana utena benniha las ná ca nu utticane.

### Ca betsi Jesús bittu ria lecani benniha

**7** <sup>1</sup> Dequi de unnua nna, daca Galilea ba requi Jesús. Laga raca lee dhoe daca Judea, cumu ca nu lo guetu ri'itu ca benni israelita nna reguilacane qui utticane. <sup>2</sup> Chiguaba da ribiga laní guetu nu te lani laní gue yo'o lhaga. <sup>3</sup> Ca betsi Jesús nna rácané:

—Biria nii güia daca Judea, qui anáchu iláguani ca benni rudheti nu rule'elu se'e nia ca milagru runlu-na. <sup>4</sup> Cumu ttu benni rdacana tsanni lona gue nu runna nna, laga tsequi nua unna nua atta gatsi. Nu runlu-na benna aní lo iyá benni qui iláquinna ganna.

<sup>5</sup> Aníaba ra ca betsie, cumu ni ca unnua lä ria lecani benniha. <sup>6</sup> Jesús nna becabie ree cana:

—Laga chi bisia ura qui neti tsiaya nia, lebi'i nna bixaba ura nna guacaba tsiale. <sup>7</sup> Ca benni gue yies lo yu-ni nna laga bi te bixa lo ni'ia gue utia di le ca unná le. Neti libunni bittu

raca uyúcana, cumu rixxi'iaya guecani bittu anca tse nu runcana. **8** Lebi'i gualtsia laní; neti bittu tsiaxxia, cumu laga chi bisia ura qui neti.

**9** Dequi de ree cana anía nna, niaba be'eanę Galilea.

### Jesús güie laní nu te lani laní gue yo'o lhaga

**10** Ttiaca dequi de chi dia ca betsi Jesús laní nna anáguaba lee diaguabe, masquiba lä aní lo iyá benni cumu güequi gatsibe. **11** Ca nu lo guetu, ca benni israelita nna ugüila labe requicana ca sá laníha, nianna ra loescani: “¿Nala nua ganna?”

**12** Anáguaba iyába ca benni requi nia rinnecana gueę. Lhécana rácana: “Benni tse bunna.” Adícana nna rácana: “Laga benni tseonna; ridí yie bunna benni.” **13** Ttiaca ni ttu benni bittu reaxinna innena idisa gueę, cumu rasquinna ca nu lo guetu, ca benni israelita.

**14** Atti liba chi dia rilagüi laníha nna bisina Jesús leli'ia gue yotuha. Lee nna udulo ttebe bele'enie ca benni.

**15** Rebanbani ca nu lo gue ca benni guetu, ca nu israelita, nianna rácana:

—¿Gasná raca gueonni? Laga bi bedhetina attiba ri'i nna.

**16** Jesús nna becabie ree cana:

—Laga nunca quionni rule'ea, nunca gue benni udhelhe neti bunni. **17** Ca benni raca lecani uncana nu raca le Tata Dios nna, guate dábaquinna gansi guanca nu rule'ea-ni gue Tata Dios, si nu anca quiba rinnea aca. **18** Nu rinne nu anca guebani nna, runba nua qui gapa ca benni-na respetu; ttiaca benni raca leni gapacana respetu benni udhele na, unnua nna rixxi'iaba nua nu anca gualí, laga bi run le nua. **19** ¿Si läba Moisés betebi ca tisa rinnabia len lebi'i? Lebi'i nna bittu rudole tisa gueę. ¿Biacala neti rdacale uttile ganna?

**20** Ca benni nna becabicana rácana Jesús:

—¿Nu xxegüiha ba yu'u lhe'elu! ¿Nú rdacana uttin lu?

**21** Jesús nna ree cana:

—Iyábale reban xxatta lele de biaca benia ttu nu xxeni sá reaca leri, ca benni israelita. **22** Gualíba Moisés boca'anbi lo sitsi urenle senni ca unbiyuu, (masquiba lä Moisés biriequibi nua, ca benniola gueliriha uduloque benque unná). Lebi'i nna rurenbale senni ca unbiyú-na masquiba anca sá reaca leri. **23** Masquiba anca sá reaca leri nna gua rurenbale senni ca unto unbiyuu chica'a-na qui bittu quitsale tisa gue ca tisa

rinnabia boca'an Moisés. Ganna anía nna ¿biacala rise'enle len neti de beonia ttu tsaga ttu unbiyuu rani sá reaca leri? <sup>24</sup> Bittu cuenta innele gue nu rilenle. Nu unlale nna gualinnee attiba raxxíbana innele.

### Ca benni rinnaba tiscana gansi Jesús anque Cristu

<sup>25</sup> Ttu lhé ca nu se'e Jerusalén nna ra ttebacana:

—¿Si läba unní nua reguilacana utticana? <sup>26</sup> Gualugüiarga. Ni nua duna rinnena aní lo iyá benni, nianna tsa laga nu bi ran unná. ¿Si chiba ria le ca nu lo gueri-na dequi gualíba unná ba nua Cristu benni chi ga'anani Tata Dios ita aca? <sup>27</sup> Unní nna gua yubari ga beaca lasni, ttiaca gansi chi bisia Cristuha nna tsa laga yuri gaxa ladu da benniha.

<sup>28</sup> Jesús nna niaba due rule'enie ca benni leli'ia gue yotuha. Atti bieninie nu ra ca nua nna unne ttebe idisa ree:

—Lebi'i nna guanca biabinle neti lhe gua yuguale ga beaca lasia lhe, ttiaca laga titú neti delha. Benni udhelhe neti nna anque benni rinne nu anca gualí. Benniha nna laga anca bienle benniha. <sup>29</sup> Neti nna anca biatie cumu atta doe biríaya delha, lee udhelhe neti lhe.

<sup>30</sup> Lania nna uxacacana udaxxucane, ttiaca ni ttucana bittu bedaxxucane, cumu laga chi bisia ura guee. <sup>31</sup> Ixeru ca benni se'e nia güia lecani guee, nianna rácana:

—Gansi chi bisia Cristuha nna gaxa laga un benniha ca milagru xxenru atti ca milagru runi unnii.

<sup>32</sup> Atti bienini ca fariseo nu ra ca benni gue Jesús-na, lacana lhe ca bixxudi anca nu loha lhe udhelha ttebacana ca güensina gue yotuha qui tsiacana sadaxxucana benniha.

<sup>33</sup> Jesús nna ree cana:

—Attu sattirba dhoa len lebi'i, lenla nna eya'a tteba atta do benni udhelhe neti. <sup>34</sup> Lania nna lebi'i nna eguilale neti, ttiaca laga ettetti'iale neti, cumu laga aca eta'ale atta esina.

<sup>35</sup> Ca benni guetu, ca nu israelita nna unnaba tisa tteba loescani rácana:

—¿Ga ladu tsionni, ri'i nna bittu eselinri na? ¿Si tsiana atta se'e adí ca benni gueri lhe'e adí ca yiesi dittu-na qui ule'enna ca nu dittu-na aca? <sup>36</sup> ¿Bi diale nu ran-na: “Masquiba eguilale neti nna laga nu neti eselinle, cumu laga eta'ale atta esina”?

<sup>37</sup> Atti bisia sá lhuxa laníha, la sá nua anca sá laní xeni, lania nna udú li tteba Jesús unnee idisa ree:

—Gansi nuxale rebisle nna gualtá len neti nna guali'iya inda. <sup>38</sup> Attiba ra lo ca sitsi gue Tata Dios: lhe'e lastoo benni tsia leni neti nna satiaba dha inda rute elha nabani ttu dia lii.

<sup>39</sup> Atti unne Jesús gue inda rute elha nabani ttu dia lii nna, gue Espíritu gue Tata Dios dhi ca benni tsia lecani benniha ba nua rinne. Lania nna laga bi chi uxí ca benni Espíritu cumu laga chi beopi Jesús iyyabáha ule'e loe anque benni ra xxeni lee.

<sup>40</sup> Atti bienini ca benni se'e nia nu ra Jesús nna ra tteba ttu lhécana:

—Unnírguaba nna gualíba ancunni benni rinne ca tisa rute Tata Dios chi ga'ana isia.

<sup>41</sup> Adícana nna rácana:

—Unníba nua Cristuha.

Ttiaca adícana nna rácana:

—Dica, laga Galilea-na iria Cristuha. <sup>42</sup> Lo ca sitsi gue Tata Dios nna ra, Cristuha nna anque ttu nu datia David, irie lhe'esi Belén nna attaguaba beaca lasi David.

<sup>43</sup> Lo ni'ia gue Jesús nna ulha'a lhe'e loescani de bittu ttudi rinnecana. <sup>44</sup> Ttu lhécana nna runcana udaxxucane, ttiaca ni ttucana lä bedaxxucane.

### Ca nu lo gue ca benni israelita bittu ria lecani gue Jesús

<sup>45</sup> Ca güensina gue yotuha nna bequibacana deyyacana atta se'e ca nu lo gue ca bixxudiha lencana ca fariseo. Ca unnua nna rácana cana:

—¿Biaca nua lä dechele?

<sup>46</sup> Ca güensinaha nna becabicana rácana:

—¿Ni ttu benni bittu chi bienintu innena atti rinne nua!

<sup>47</sup> Ca nu fariseo nna becabicana rácana:

—Lebi'i nna ¿si chiguaba uxí yiena le? <sup>48</sup> ¿Si nux ttu ca nu lo gueri-ni o nux ttutu ri'itu ca fariseo-ni chi güia letu gueni aca? <sup>49</sup> Ca benni rienini gue Jesús bittu yucana nu ra lo ca tisa rinnabia bodha'ana Moisés nna dia nittibacana.

<sup>50</sup> Ttu benni fariseo lana Nicodemu nu güiana guanne lenna Jesús ttu lo rela nna unne ttebana rana:

<sup>51</sup> —Lo ca sitsi rinnabia-na laga bi ra lo cunna gua dica udelha iyyari ttu benni bittu chi bieninri innána bixa benna.

52 Ca unnua nna becabicana rácan na:

—Lu nna ¿si nu Galileo guabalu? Beguilarga lo ca sitsi gue Tata Dios laga bi ra dequi iria benni rinne ca tisa rute Tata Dios Galilea-na.

### Ttu nuila beyaxxuna leni attu unbiyuu subi

53 [Coa ttuttuba ca benni bodaxxu neda guecani deyya liscani.

**8** <sup>1</sup> Ttiaca Jesús nna daca lo lhilhi atta da ca yaga gue olivuha la die. <sup>2</sup> Betteyú dila nna besin ttebe leli'ia gue yotuha attu libe. Iyába ca benni bedesincana atta due. Lee nna udo ttebe bele'enie cana. <sup>3</sup> Ca nu rule'e nu ra lo ca tisa rinnabia lencana ca fariseo nna uchecana ttu nuila beyaxxuquinna leni attu unbiyuu subi bedúcan na salhe gue ca nu se'e nia. <sup>4</sup> Nianna ra ttebacana Jesús:

—Maestru, nuila du ni nna beyaxxuntu na leni attu unbiyuu subi. <sup>5</sup> Lo ca tisa rinnabia-na nna ra Moisés, gatti ca loesi nuila-na leni iyya. Lu nna ¿bila ralu?

<sup>6</sup> Lacana nna aníaba beguila lecani rácana benniha qui ibixxie bixa inne, aníachu nna te ro'ocani udelha iyyacane. Ttiaca Jesús nna biachu ttebe, uduloe runie letra lo yu leni xbine. <sup>7</sup> De ttu runbacana duelha rinnaba tiscane nna, bedú li ttebe ree cana:

—Nuxale bittu tulha guele te nna primeru unnua udaxxuna iyya use'ena nuila-na.

<sup>8</sup> Bedeyachu ttebe attu libe, bededulo dacabe redeonie letra lo yu. <sup>9</sup> Atti bienquinna nu ra benniha nna, udulo ttebacana ttuttu ttutubacana deyyacana. Primeru ca nu yaxxuha udulo güequi, lenla nna güequi ca uncuitiha, axta liba beacana. Atturba Jesús be'eane nia lenie nuila bedúcana salheha. <sup>10</sup> Bedú li tteba Jesús, unnaba tise nuilaha ree na:

—Nuila ¿nala ca nua? ¿Si niba ttu ca nua bittu bedelha iyyacana lu gattilu?

<sup>11</sup> Lana nna rana:

—Niba ttucana, xa tata.

Jesús nna ree na:

—Anáguaba neti bittuguaba udelhiyya lu. Nnanna nna beyya lislaha nna bitturu unlu nu lä anca tse.]

**Jesús ree:** Neti anca xiani gue ca benni se'e yies lo yu-ni

12 Jesús nna bedulo ttebe unnee attu libe ree ca benni se'e nia:

—Neti anca xiani gue ca benni. Benni etenalhana neti nna laga tsequi nua atta chulha, cumu gattaba xiani rute elha nabani ttu dia lii gue nua.

13 Ca fariseo nna rácane:

—Laga bi daca nu rálha cumu la luba rixxi'ialu nuxa ancalu.

14 Jesús nna becabie guecani ree:

—Nu ria-ni nna gua daca bunny, masquiba la neti ba rixxi'iaya nu anca quia, cumu gua yuba neti ga ladu delha\_lhe ga diaya\_lhe, ttiaca lebi'i nna laga yule ga ladu delha\_lhe ga diaya\_lhe. 15 Lebi'i nna runbale elha uxtisi gue ca benni leni elha uxtisi gue yies lo yu-ni. Neti nna laga nu benni runia elha uxtisi gueni aná. 16 Ttiaca gansi neti unia elha uxtisi nna unba\_nua attiba raxxína, cumu laga tturu neti unia elha uxtisi, irpaba tata quia benni udhelhe neti untu nua. 17 Lo ca tisa rinnabia guele-na ra: Gansi se'e chupa benni ttuba rinnecana gue nu biláquinna nna, dacaba nu rixxi'ia ca nua. 18 Neti anca ttu nu rixxi'ia nuxa anca. Tata quia benni udhelhe neti nna anque attu benni rixxi'ia nuxa anca.

19 Lacana nna unnaba tisacana rácane:

—¿Nala tata gueluha?

Jesús nna becabie ree cana:

—Lebi'i nna laga anca bienle neti, niguaba tata quia. Ttirca anca bienle neti nna lania nna anca biaguabinle Tata quia.

20 Ca tisa-ni unne Jesús laca due rule'enie ca benni leli'ia gue yotuha gaxxaba atta sia ca nu rigu'ucana una lhe'ecaniha. Ttiaca ni ttucana bittu bedaxxucane cumu laga chi bisia ura guee.

21 Jesús nna ree ca benni attu libe:

—Neti nna eyyaba, lebi'i nna eguilale neti, ttiaca lebi'i nna gattibale de nujale yua gue nu lä anca tse runle-na, cumu atta eya'aya nna lebi'i nna laga eta'ale.

22 Ca benni quia ca nu israelita nna rácana:

—¿Si rulaba leni utti la la ttebana nuarca rana ri'i, atta eyyana nna ri'i nna bittu aca eta'ari?

23 Lee nna ree cana:

—Lebi'i nna ancale benni gue liree, neti nna anca benni gue güetsaa. Benni gue yies lo yu-ni ba ancale, neti nna laga benni gue yies lo yu-ni neti. 24 De nuala nna ria le, gattibale de nujale yua gue nu lä anca tse runle, cumu gansi bittuba ria lele ria neti anca benni chi rpea le anca nna, lebi'i nna gattibale de nujale yua gue nu lä anca tse runle.

25 Laniala unnaba tiscana rácana:

—Lu nna ¿nú ancalu?

Jesús nna becabie guecani ree cana:

—La unnua xa nua ria le primeruha li nna. 26 Gue nu runle-na nna xxeni nu tetia upea le lhe udelhiyya le lhe, ttiaca benni udhelhe netiha anque benni rinne nu anca gualí. Nu rabe neti nna unnua ba rpea ca benni se'e yies lo yu-ni.

27 Ca benni se'e nia nna ni lä guadú lecani gue Tata guee do iyyabáha ba nua rinne Jesús ree cana anía. 28 Lee nna ree cana:

—Gansi chi ulhidhale neti benni unbiyuu da iyyabáha lo ya crusi nna lanialiba tte denle dequi neti nua anca nu chi ria le anca, bittuguaba runia nu anca quia lhe. Nu bele'ebani tata quia neti, unnua ba rinnea. 29 Cumu tata quia benni udhelhe neti nna len neti ba due, tsa laga chi bodha'ane neti ttuba, de satiaba runia nu raca lee.

30 Atti ra Jesús anía nna, ixeru ca benni güia lecanie.

### Ca xi'in Tata Dios leni ca nu to'o lo sina gue nu lä anca tse runcana

31 Jesús nna ree ca benni quia ca nu israelita chi güia lecanie:

—Gansi lebi'i nna usiguile udole tisa gue nu ria le-ni nna, lanialiba acale nu gualíga anca nu rudheti nu rule'ea.

32 Anialiba nna un biale nu anca gualí, nu anca gualíha nna unie lhale.

33 Lacana nna becabicana guee rácane:

—Ri'itu ancatu benni datia Abraham, tsa laga chi uca ri'itu nu to'o lo sina gue nuxa benni. ¿Gasná ralu nna ese'e látu?

34 Jesús nna ree cana:

—Neti nna gualíbatia ria le, iyába ca nu runi nu lä anca tse nna attiba nu to'o lo sina ba ancacana gue nu lä anca tse runcana. 35 Ttu nu to'o lo sina nna laga bi elha ralha nua

dhona ttu dia lii lisi benni bananie na, xi'in biyuu benni bananie na liba nna ralhana dhona ttu dia lii nia. <sup>36</sup> Larcala nna gansi neti xi'ini Tata Dios odiláya le nna lanialiba acale nu gualíga se'e lále. <sup>37</sup> Neti nna gua yuba dequi ancale benni datia Abraham; ttiaca lebi'i nna runlale uttile neti, cumu bittu raca lele tsia lele gue ca tisa quia-ni. <sup>38</sup> Neti nna rinneba nu bilátia atti doa len Tata quia, lebi'i nna runbale nu bienbinle ra tata gueleha.

<sup>39</sup> Lacana nna rácana:

—Abraham ba anca tata gue ca tata guetu.

Jesús nna ree cana:

—Ttirca gualíga ancale benni datia Abraham nna lania nna gua runbale ca nu tsee ben bi'iniha. <sup>40</sup> Ttiaca lebi'i runlale uttile neti de anca benni rixxi'ia nu anca gualí nu bienbatia ra Tata Dios. Abraham nna laga aná ben bi'iniha. <sup>41</sup> Lebi'i nna runbale loesi nu run tata gueleha.

Lacana nna rácana:

—Ri'itu nna laga xi'ini attu nu subitu, ttuba tata guetu do. Xi'ini Tata Dios ba ri'itu.

<sup>42</sup> Jesús nna ree cana:

—Gansi gualíga ancale xi'ini Tata Dios nna, gua racabinle quia cumu neti nna atta do benniha biríaya delha dua ni, laga titú neti delha; labé udhelhe neti. <sup>43</sup> ¿Biacala lä rite denle nu ria le-ni? Bittu rite denle cumu laga raca lele udo nagale gue nu ria. <sup>44</sup> Lebi'i nna nu xxegüiha ba anca xxudile. Nu ru'u le tata gueleha ba re'eo lele runle. Lana nna atti uduloli ure yies lo yu-ni ancana nu runi elhutti, laga runna nu anca gualí cumu laga rinnena nu gualí. Gansi chi rinnena run leni nna rinnebana nu ancabana, cumu ancana nu run leni lhe xxudi ca nu run lecani lhe. <sup>45</sup> Neti nna ganna de rinnea nu anca gualí nuarca lä ria lele quia. <sup>46</sup> ¿Núle cuequi líle dequi anca nu te tulha gueni? Gansi rinneba nu anca gualí nna ¿biacala lä ria lele quia ganna? <sup>47</sup> Benni anca gue Tata Dios nna ca tisa gue benniha ba rudo naga nua, ttiaca lebi'i nna laga ancale gue Tata Dios nuarca bittu raca lele udo nagale ca tisa gue benniha.

**Jesús nna ree, lee nna chila doe atti uli Abraham**

<sup>48</sup> Ca benni quia ca nu israelita nna becabicana rácana Jesús:

—Gualíbintu ratu lu, nu samaritanu balu, nu xxegüiha ba yu'u lhe'elu.

49 Jesús nna becabie guecani ree:

—Laga nu nu xxegüi yu'u lhe'e neti, nu runba neti nna rapa tata quia respetu, lebi'i nna bittu rapale neti respetu. 50 Neti nna laga runia qui ulhopi ca benni neti; gua doba ttu benni runie açã nu xeni. Leeonna runi elha uxtisi. 51 Neti nna gualíbatia ria le, benni udona tisa gue nu ria nna tsa laga gatti nua.

52 Ca benni quia ca nu israelita nna becabicana rácana:

—Nannarguaba nna chi yu tsetu, lu nna nu xxegüiha ba yu'u lhe'elu. Abraham nna uttiba bi'iniha, anáguaba ca bi'ini unne ca tisa bete Tata Dios lhe, lu nna ralu: “Nu udona tisa gue nu ria nna tsa laga gatti nua.” 53 Lu nna ¿si xxenrula ra lelu atti tata xen guetu Abraham? Bi'iniha nna uttibabi, anáguaba ca bi'ini unne ca tisa bete Tata Dios. Lu nna ¿núna runlu dequi ancalu?

54 Jesús nna becabie ree:

—Gansi la neti ba unia açã nu ra xxeni leni nna, tsa laga bi daca nua. Ttiaca tata quia benni rale anca Tata Dios guele-na runie açã nu ra xxeni leni. 55 Lebi'i nna laga anca bienle benniha, netirguaba nna anca biatie. Gansi innía bittu anca biatie nna, lania nna açã ttu nu run leni attiba lebi'i, ttiaca gualíba anca biatie nna rudoa tisa gue nu ree. 56 Abraham bi'ini uca tata gue ca tata gueleha nna bedaquinbi de ilenbi sá isiaya. Atti bilenbi bisia sá nna be'eo lhaba lebi.

57 Ca benni quia ca nu israelita nna bequicana rácana Jesús:

—Nila medi gayua (50) ida lati aquinlu nna, gua ralu dequi bilenlu Abraham.

58 Jesús nna ree:

—Neti nna gualíbatia ria le, atti antisla gali Abraham nna chila doa lania.

59 Lania nna bedaxxu ttebacana iyya uxacacana usiacana Jesús. Lee nna becatsi tteba loe berie leli'ia gue yotuha.

### Jesús beonie ttu nu xua loni

9 <sup>1</sup> Atti bete Jesús deyye nna bilanie ttu unbiyuu xua loni. Aníaba anca nua atti ulna. <sup>2</sup> Ri'itu ca bi'ini rudheti nu rulee nna unnaba tisa ttebatu ratu benniha:

—Maestru ¿biaca xua lo unbiyuu-na atti ulna? ¿Si de ben ca tata gueniha ttu nu bittu anca tse aca, si labana benna nu lä anca tse aca?

3 Jesús nna becabie ree:

—Laga de beni ca tata gueonna ttu nu bittu anca tse, niguaba de beni unná ttu nu lä anca tse; anca bunna aná qui leni milagru uni Tata Dios nna ule'e loe anque nu ra xxeni lee.

4 Laca anca resá nna unxxiri sina gue benni udhelhe neti, cumu gua da ribiga aca lo rela nna lania nna tsa larga nurua aca gueni cuenna sina. 5 Laca doa yies lo yu-ni nna, neti anca xiani gue ca benni se'e yies lo yu-ni.

6 Dequi de ra Jesús anía nna, bettuttu tteba xxenie lo yu. Leni unnua ba benie saro'o yuna, atti utabi ttebe nua ro'o lo nu xua loniha. 7 Lania nna ráttebe unbiyúha:

—Güia guattí lolu ro'o bila inda te lani Siloé-na. (Tisa “Siloé” dienna innána sola.)

Nu xua loniha nna güia ttebana guattí loni, atti bequina besinna nna chi rilenña. 8 Ca benni se'e gaxxaba atta re'eanna lhe ca benni chi biláquinna ridona güennaba belhi lhe rinnaba tisa loescani rácana:

—¿Si läba unníba nua ridona güennaba belhi?

9 Ttu lhécana nna rácana:

—Gualíba, unnua bunna.

Adícana nna rácana:

—Dica, laga unnua unná. De rule'e bunna attiba rule'e nua.

Lana nna rana:

—Neti ba nua.

10 Nianna unnaba tisacan na rácan na:

—¿Galasná uca bilenu?

11 Lana nna becabina rana:

—Unbiyuu lá Jesús-na ba benie yuna utabie ro'o loa, nianna ree neti: “Güia guattí lolu ro'o bila inda lá Siloé-na.” Neti nna güia tteba, utíba loa nna bilá ttebatia.

12 Laniála nna rácan na:

—¿Nala unbiyúha?

Lana nna rana:

—Bittu yua.

13 Uche ttebacana nu uxua loniha guadúcan na lo ca nu fariseo, 14 cumu de anca sá redí letu, ca nu israelita, la sá atti beni Jesús yuna leni xxenie, utabie ro'o lo nu uxua loniha qui ilenna. 15 Ca nu fariseo nna bedennaba tisa ttebacan na gaxasná uca beali loni. Lana nna becabina rana:

—Yunaba utabie ro'o loa, nianna utí tteba loa nna bilá ttebatia.

16 Ttu lhé ca fariseo nna ra ttebacana:

—Unbiyuu beni unnii nna laga ancunna gue Tata Dios, nuarca runbana sina sá redí leri.

Adícana nna rácana:

—Laga aca gue ttu unbiyuu runi nu lä anca tse unna ca milagru runi unná.

Lo ni'ia gue nua nna bila'a lhe'e loescani de bittu ttudi rinneca. 17 Bedennaba tisa dacabacana unbiyuu uxua loniha redeácan na:

—Lu nna ¿bila ralu gue nu benna rilenlu-na?

Lana nna rana:

—Neti nna ria, ben-na anque ttu benni rinne ca tisa rute Tata Dios.

18 Ttiaca ca nu lo quia ca nu israelita nna tsa laga ria lecani dequi gualí uca nua ttu nu xua loni, nnanna nna chi ancana nu rilani, axta qui uxcana tata nan gue nua.

19 Nianna unnaba tisacana ca unnua rácan cana:

—¿Si xi'inle nu du ni, nu rale anába xua loni ulna?

¿Ttiluca nna rilani unná nnanna?

20 Ca tata nan gue nua nna becabicana rácana:

—Yubatu xi'inbatu unnii lhe xuaba loni atti ulna lhe, 21 ttiaca laga yutu gaxasná uca chi rilenna nnanna, bittu guaba yutu nuxa benna bilenna lhe. Na gualnnaba tisa na chiba ancunna nu xxeni, guaguixxi'ia bunna gaxasná uca bilenna.

22 Aníaba ra ca tata nan gue nua de rasbaquinna ca nu lo guetu, ca nu israelita, cumu ca unnua nna chi unnecana rácana, ttu tsaba ebeacana lhe'e yo'o atta rudhetitu ca tisa gue Tata Dios nuxa innána Jesús anque Cristu benni chi ga'anani Tata Dios odileę ca benni. 23 Nuarcala nna ra ca tata nan gue nua: “Na gualnnaba tisa na, nu xxen ba chi ancunna.”

24 Ca nu lo guetuha nna bedexai dacabacana nu uxua loniha, nianna rácan na:

—Aní lo Tata Dios uxí ro'olu. Ri'itu nna yutu nu runi nu lä anca tseba anca nu benna bilenlu-na.

25 Lana nna becabina rana:

—Bittu yua gansi ancana nu runi nu lä anca tse o bittu. Nu yurbą nna neti uca nu xua loni, nnanna nna chi rilátia.

26 Bedennaba tisa dacabacan na attu libe rácan na:

—¿Bi bedhacan lu? ¿Bi benna qui bilenlu?

27 Becabi ttebana ran cana:

—Laa chiba ria le nna lebi'i nna bittu bedo nagale. ¿Biacá rdacale quixxi'iatia le attu libe? ¿Si rdacaguale acale benni rudheti nu rule'e unná?

28 Laniale nna bedhaca disacan nua rácan na:

—Luba ancalu nu rudheti nu rule'e unná; ri'itu nna nu rudheti nu bele'e Moisés liba anca ri'itu. 29 Ri'itu nna yutu unne Tata Dios len Moisés, ttiaca unbiyú-na nna niba lä yutu ga ladu donna.

30 Nu uxua loniha nna becabina rana:

—Unnirguaba nna ancana ttu nu runna reban leri. Lebi'i nna rale dequi bittu yule ga ladu da ben-na, ttiaca neti nna benie bilátia. 31 Ri'i nna gua yubari, Tata Dios nna laga rienini benniha gue ca nu runi nu lä anca tse-na; sunruba gue ca nu ria lecanie lhe rudocana tisa gue lhe rieninie. 32 Ni ttu libe bittu chi bieninri gue nuxa quixxi'iana innána beni ttu benni bilani ttu nu ulna ancana nu xua loni. 33 Gansi läba Tata Dios udhelhe ben-na nna, tsa laga aca gue ben-na unie ttu bixa.

34 Lania nna ra ttebacan nua:

—Lu nna atti ulililu chi ancalu nu nuja yua. ¿Rdocalu ule'enlu ri'itu nna?

Bebequi ttebacan na ttu tsaba lhe'e yo'o atta rudhetitu ca tisa gue Tata Dios.

35 Jesús nna bine rácana dequi bebeabacana nu uxua loniha. Atti beti'ie nua nna ra ttebe na:

—¿Si gua ria lelu benni unbiyuu da iyyabáha?

36 Unbiyúha nna becabina rana:

—Utixxi'ien neti nuxque nua, xa tata, qui tsia lasie.

37 Jesús nna ree na:

—Laa chiba bilenlu benniha. Neti nua.

38 Laniale nna bedú tteba xibi unbiyúha lo Jesús, nianna rana:

—Gua riaba lasia lu, xa tata.

39 Jesús nna ree:

—Neti daya yies lo yu-ni qui unia elha uxtisi; delha qui unia ilani ca nu xua loquinna, ca nu racaquinna ancacana nu rilani nna acacana attiba nu xua loni.

40 Atti bienini ttu chupa ca fariseo se'e nia reę anía nna unnaba tisa ttebacana benniha rácanę:

—Ri'itu nna, ¿si nu xua lobani ancatu?


41 Jesús nna becabie reę:

—Ttirca ancale nu xua loni nna laga bi nujale yua gue nu lä anca tse runle-na. Ttiaca de rale, rilenle nna nuarca nujale yua gue nu lä anca tse runle-na.

### Jesús riguixxi'ie gue ttu nu ria lo ca carne'e

**10** <sup>1</sup> Jesús nna reę:  
 —Neti nna gualíbatia ria le, nu bittu rita'ana daca ro'o puerta gue curráli atta yu'u ca carne'e-na, sinuqui attu atta subila ropina rita'ana, nu ribana sigá ba nua, nu rigua la fuersa nu te gue benni ba nua lhe. <sup>2</sup> Nu rita'a daca ro'o puerta liba nna ancana nu ruyú ca carne'e-na. <sup>3</sup> Nu du rapa ro'o curráliha, nua nna ridhalbana puertaha rita'a nu ria lo ca nua. Ca carne'eha nna reon biacana tsi'i nu ria locaniha. Lana nna raxna ca nua coa ttuttu ca nua rudettina lácani qui cuean cana lhe'e curráliha. <sup>4</sup> Dequi de chi uleana iyá ca nu anca gueni nna, riner ttebana lo ca nua. Ca unnua nna rano ttebacan na cumu reon biacana tsi'ini. <sup>5</sup> Delo attu nu subi nna laga ranocan nua, ruxunni lacana lo nua, de bittu anca biauquinna tsi'i attu nu subi.

<sup>6</sup> Ca tisa utixxi'ien Jesús ca benni se'e nia ancacana ttu tisa nu ttuba raxxína len attu nu subi, ttiaca ni lä guadú lecani bixa dianie reę cana anía.



### Jesús anque attiba ttu benni ruyú tse ca carne'e

7 Jesús nna ree ca benni se'e nia attu libe:

—Neti nna gualíbatia ria, neti anca puerta du ro'o currali atta reta'a ca carne'e-na. 8 Iyába ca nu rácana dequi lacana ancacana Cristu chi bisia atti lati isiaya yies lo yu-ni nna, ubana ba ca nua, larca bittu bedo naga ca carne'e-na guecani. 9 Neti anca puerta du ro'o curraliha. Benni ga'ana atta dua nna gualába nua. Unnua nna acana attiba ttu carne'e reria reta'abana lhe'e curraliha, saxxacana nu gona lhe. 10 Ubanaha nna sun tteba da nua lhanana, uttina nna utse'e lona nna; ttiaca neti nna delha utea elha nabani guele qui gatta xxeni elha nabani guele ttu dia lii.

11 'Neti anca attiba ttu benni ruyú tsena ca carne'e gueniha. Nu ruyú tsena ca carne'e gueniha nna, rerú iqui rerú leni rute elha nabani gueni cuenta gue ca carne'eha. 12 Nu naxabana rena lo ca carne'eha nna, atti rilenna da sagueha nna ruse'e bixxina ca nua nia ruxunnina, cumu laga guen ca nua, yaba le nu beaca gueni ca nua. Sagueha nna risin ttebana rugüena ca carne'eha, atti rutsia ttebinna ca nua qui tsiacana gatti laduba. 13 Ruxunniba nu re lo ca carne'eha cumu laga de ca carne'eha nua run nua, lhiaxaba nua denona.

14 'Neti anca attiba ttu benni ruyú tse ca carne'e gueni. Anca biatia ca carne'e anca quia, anáguaba ca nu anca quia nna anca biaguabaquinna neti. 15 Attiba tata quia anca bienie neti, anáguaba neti anca biaguatie. Neti utea elha nabani quia qui odiláya ca benni, attiba ttu benni re lo ca carne'e rerú iqui rerú leni elha nabani gueni rutena cuenta gue ca carne'eha. 16 Se'e guabatia adí ca carne'e bittu babacana len ca nu se'e ni. Lacana lhe saxía, ca unnua nna güiyienbaquinna quia. Lania nna ttuba eyaca iyábacana, ttu guaba benni gape cana lhe.

17 'Larcala nna tata quia racanie quia, cumu neti utea elha nabani quia qui odiláya ca benni, lenla nna eyacatia attu libe. 18 Tsa laga nu ettattúana elha nabani quia-ni, netiba rerú iqui rerú lasia na utea na. Neti nna anca nu ra xxeni leni. De nua nna raca quia utea elha nabani quia-ni lhe edía na attu libe lhe. Unnii ra tata quia unia.

19 Atti bienini ca benni quia ca nu israelita nu ree nna, bedela'a tteba lhe'e loescani attu libe. 20 Ixerucana rácana:

—¿Biacunna rudo nagale gueni? Gua yubale nna nu xxegüiha ba yu'u lhe'eonna, iquibunna raca lhe.

**21** Adícana nna rácana:

—Ni ttu nu yu'u nu xxegüi lhe'eni aca gueni innena aná. Laga aca gue ttu nu xxegüi unna ilani ca nu xua loquinna.

### Ca nu israelita bittu rulabicana Jesús

**22** Atti risia raca idilhaha nua runi ca benni quia ca nu israelita ttu laní lhe'e yiesi Jerusalén. Rexxa letu sá atti beaca le'ea yotu guetuha. **23** Jesús nna niaba requie leli'ia gue yotuha atta te lani coreddori gue Salomón. **24** Ca benni quia ca nu israelita nna bitupa ttebacana sa bi'iabę, nianna rácane:

—¿Nucaluni nna unlu qui bitturu udú chupana letu? Gansi luba nua Cristu nna, tsala utixxi'ia aní lo iyátu.

**25** Jesús nna becabie reę cana:

—Laa chiba ria le nna, lebi'i nna bittu güia lele. Ca milagru rute tata quia runia-ni nna runna rule'e lo nuxa anca. **26** Lebi'i nna laga ria lele, cumu laga ancalle carne'e quia. **27** Ca benni anca attiba carne'e quia nna gua rienbaquinna tsi'ia rinnea. Neti nna anca biatia cana, lacana nna denocana neti. **28** Neti rutea elha nabani guecani qui aca bancana ttu día lli, bittu tsia nitticana lhe, nuttu guaba nu dhana ettattuana cana lo náya lhe. **29** Tata quia benni beteę cana las náya nna xxenirura le benniha atti nuxaba benni, larcala nna laga nu dhana cuana cana lo ne. **30** Tata quia nna neti nna, ttuba ancatu.

**31** Bodidaxxu dacaba ca benni quia ca nu israelita iyya qui use'ecane. **32** Jesús nna reę cana:

—Ixe ca milagru tsee bete tata quia unia chi benia aní lole. ¿Lo ni'ia gue nú ca nua rdacale usiale neti iyya?

**33** Ca benni quia ca nu israelita nna becabicana rácana:

—Laga usia ri'itu lu iyya lo ni'ia gue ca milagru tsee runlu-na. Usiatu lu iyya cumu len nu rálha nna rinne güelu gue Tata Dios. Lu nna benniba ancalu nna runlu dequi ancalu Dios.

**34** Jesús nna reę cana:

—¿Si läba lo ca tisa rinnabia denle-na ra Tata Dios: “Neti chi ria, lebi'i ancalle diosi”? **35** Ri'i nna yubari, laga aca gueri otsiari nu ra ca tisa gue Tata Dios. Leę nna reę diosi anca ca benni beteę ca tisa gue-na lencabi. **36** ¿Biacala neti benni chi riesinie udhelhe yies lo yu-ni rale dequi rinne güea gue Tata

Dios de ria: “Neti anca Xi'ini Tata Dios”? 37 Gansi bittuba runia nu runi tata quia nna, bittu tsia lele quia. 38 Ttiaca gansi runia nu runie nna, masquiba lä ria lele neti, gualtsia lele gue nu runia, qui tsala nna tte denle, tata quia nna ttuba benni anq̄ lenie neti, neti nna ttuba benni anca lenie.

39 Bedeon ttebacana odidaxxucan̄e attu libe, lēe nna beriabe lo nácani.

40 Jesús nna dedhia dacabēe attu ladu gue yoo Jordán. Niaba be'eanēe atta udulo Juan begadibi benni inda.

41 Ixeru benni risina atta du benniha, nianna rácana:

—Gualí galá Juan nna laga bi milagru benbi, ttiaca iyába nu utixxi'iabi gue ben-ni nna gualíba nua.

42 Ixeru ca benni se'e daca nia güia lecanie.

### Ttu benni lana Lázaru uttina

**11** 1 Lhe'esi lá Betania nua do ttu benni rani lana Lázaru. Niaguaba nua beaca lasi María lenna xilani Marta.

2 María dana Lázaru nu raniha nua ulu'una seti rure xixxi ni'ia Jesús. Leni itsiquibani bodibisna ca ni'ia benniha.

3 Irpa xilabacani udhelhacana rasona len Jesús rácanēe:

—Raniba nu raca xxattinlu gueniha, xa tata.

4 Atti chi bina Jesús nu rácana nna ra ttebēe:

—Isagüee yu'u nua nna laga anca nua nu uttin na, delába unnua nna ixúla isagüeha qui inná ca benni: “¡Xxeni ra lee Tata Dios!” anáguaba qui ule'e lo neti Xi'inie anca benni ra xxeni leni lhe.

5 Masquiba raca juisiani Jesús gue Lázaru lhe gue Marta lhe gue María lhe, 6 be'eanrubēe atta doeha a chupa ubisa dequi de bin̄e rani Lázaru. 7 Dequila nna rēe ri'itu ca bi'ini rudheti nu rule'e:

—Gualtsá tsiari attu libe daca Judea.

8 Ri'itu ca bi'ini rudheti nu rule'ēe nna ratue:

—Maestru ¿si edeyya dacabari nia attu libe? Inqui ttu sába nua uxaca ca benni gueri nu israelita se'e nia usiacan lu iyya nna.

9 Jesús nna becabie guetu rēe:

—¿Si läba tsi'inu ura yu'u lhe'e ttu sá nna? Nu requi resá nna laga richecu nua cumu xiani gue yies lo yu-ni nna gua rudánbēe gue nua. 10 Ttiaca nu requi lo rela nna ichecuba nua cumu bittu xiani yu'u atta diana.

11 Dequi de unnua nna reḡ:

—Lázarū nu raquinri gueniha nna chi uta'adhi nua.

Tsiala qui odibania na.

12 Ri'itu ca bi'ini rudheti nu rule'e nna ratue:

—Xa tata, gansi ti'iedhiba nua nna güeyacaba nua ganna.

13 Gue elhutti gue Lázarū ba nua rinne Jesús, ri'itu nna uquntu ga gue bisuela nu runna ra'adhiri-n ba nua rinnee.

14 Laniala nna utixxi'ia tsenie ri'itu reḡ:

—Uttiba Lázarū. 15 Re'eo lasia nuttuha du nia cumu unnua nna ancana ttu nu tsee len le. Unnua unna tsiaru lele neti. Larcala nna gualtsá sanga tsiari sagüiari na.

16 Maxi bi'ini rácana Cuachiha nna ra ttebabí adítu ca bi'ini rudheti nu rule'e Jesús:

—Gualtsá guaba tsiari, qui ttuba gatti lenri ben-na.

17 Atti bisina Jesús Betania nna, bina ttebe dequi chila uca ttapa ubisa bigatsi Lázarū. 18 Lhe'esi Betania nna gaxxaba rena leni Jerusalén, attiba nu ridá benni ttu ura. 19 Ixeru ca benni quia ca nu israelita chi güiacana guanahicana Marta lenna María, rutcana elha xen lasi lencana cumu se'e si'icana de utti dancaniha. 20 Atti bina Marta chi da Jesús nna, biría ttebana diana guatsána benniha. María nna niaba be'eanna lhe'e yo'oha. 21 Marta nna rana Jesús:

—Ttirca dobalu nii, xa tata, lania nna laga utti dana.

22 Ttiaca neti nna yua nnanna, bixaba innabalu leni Tata Dios nna leḡ nna gutebe nua lenlu.

23 Jesús nna reḡ na:

—Eyacabani danluha attu libe.

24 Marta nna rana Jesús:

—Chiba yua nna güeyacabani unná gansi chi beacani ca nu yatti-na attu libe atti isia sá lhuxa.

25 Jesús nna reḡ na:

—Neti anca benni runi reacani ca nu yatti-na lhe rutea elha nabani ttu dia lii lhe. Nu tsia leni neti nna masquiba chi uttina güeyacabinná attu libe. 26 Iyába ca benni anca bani ria lecani neti nna, laga gatti ca nua ttu tsa. ¿Si gua ria lelu nu ria-ni?

27 Marta nna rana:

—Agu, tata. Riaba lasia, lu ancalu Cristu, Xi'ini Tata Dios, benni chi ga'ana isia yies lo yu-ni.

28 Dequi de rana anía nna, güia ttebana gualisana xilni María, nianna sigába rana nua:

—Niba chi du Maestruha. Lee nna raxie lu.

29 Dequi de chi bina María nna, rigá nina udú lína diana atta du Jesús. 30 Jesús nna laga chi ute'e lhe'esiha, sna dube<sub>u</sub> atta beti'ie Marta. 31 Atti bilani ca benni quia ca nu israelita rute elha xen lasi leni María se'e lenna lhe'e yo'oha ruxunni nina udú lína biríana, lacana nna dia ttebacana denocan María, cumu ucaquinna ga lo baa ba dia nua sachesna.

32 Bisinba María atta du Jesús nna bilábinna benniha nna bedú tteba xibini loe, nianna ranę:

—Ttirca dochibalú nii, xa tata, lania nna laga utti benni dana.

33 Atti bilani Jesús ribesna, anáguaba ca benni quia ca nu israelita dia lennaha lhe, su suba guadina itúba lhe'e alma gue benniha, bedú guate ttebanę. 34 Unnaba tisa ttebe<sub>u</sub> reę cana:

—¿Galiga guacatsile nua?

Lacana nna becabicana rácanaę:

—Utá begüia, tata.

35 Jesús nna ures ttebe<sub>u</sub>. 36 Ca benni quia ca nu israelita nna ra ttebacana:

—Gualgüiarga. ¡Cattipa racanie gueonna!

37 Attu lhécana nna rácana:

—Unnii beni bilani nu xua loniha. ¿Si bittuba uca gueonni gaxasná unna qui bittu gatti Lázaru?

### Lázaru beaquinna attu libe

38 Jesús nna su suba bedeadina lhe'e alma gueę attu libe atti bisinę ro'o belea do lhe'e iyya ttoha. Unnua nua ancana baa. Leni ttu iyya xeniba to ro'o nua. 39 Nianna reę:

—Gualcua iyya-na.

Marta dana nu yattiha nna ranę:

—Gaxa chiba rureonna, xa tata, cumu chi uca ttpa ubisa atti uttina.

40 Jesús nna reę na:

—¿Si läba ria lu, gansi tsia lelu nna güilábinlu nu xxeni ra le Tata Dios?

41 Utuabacana iyyaha nna, ulhidha tteba lo Jesús begüie lo bea-na, nianna reę:

—Xquixabalu, xa Tata, becabibalu gue nu ria. <sup>42</sup> Neti nna gua yuba, satiaba rieninlu quia, ttiaca de ca benni se'e ni ba nna ria aná, qui tsia lecani gualí lu udhelhalu neti.

<sup>43</sup> Dequi de reę anía nna uresi'ie idisa reę:

—¡Lázarú, beria na!

<sup>44</sup> Nu yattiha nna detubiba lari ni'iani lhe náni lhe beriana, detubi guaba lari loni lhe. Jesús nna reę ca benni se'e nia:

—Gualedhasi na ca lari-na, qui aca edána.

**Ca nu anca nu lo gue ca nu israelita  
boquinna iquicani utticana Jesús**

<sup>45</sup> Ixeru ca nu dia leni María güia lecani Jesús atti biláquinna nu benie. <sup>46</sup> Ttiaca attu lhécana nna güia ttebacana guattixxi'iaquinna ca nu fariseo gue nu beni Jesús. <sup>47</sup> Laniala nna ca nu lo gue ca bixxudiha lencana ca fariseo bottupa ttebacana adí ca nu lo, nianna ra ttebacana ca unnua:

—¿Bila unri nnanna? Unbiyuu requina nna ixé lhaba ca milagru runi unná. <sup>48</sup> Gansi ugüelhabari anába na requibana, iyába benni tsia leni gueonna, lania nna ca nu rinnabia gue Roma nna isiaba ca nua utse'e locana yotu gueri-ni lhe yies gueri-ni lhe.

<sup>49</sup> Ttu nu sela len lacana lana Caifás, ancana bixxudi xeni rinnabia guecani la ida nna unnena rana:

—Lebi'i nna tsa laga yule; <sup>50</sup> niguaba lä rite denle dequi tserla anca len ri'i gatti ttuba benni cuenta gue ttu yiesi, attichula iyába benni gattina.

<sup>51</sup> Caifás nna laga nu yu'u iquini nua unnena. De ancabana bixxudi xeni rinnabia la ida nna rana anía. Unnebana ca tisa bete Tata Dios lenna qui quixxi'iana Jesús nna gattie qui quixe guetu, ca benni israelita. <sup>52</sup> Bittu guaba sunru qui lhatu ri'itu ca benni israelita, anáguaba gatti guabe qui ottupe iyá recha ca xi'ini Tata Dios se'e gatti laduba. <sup>53</sup> Larcala nna bedá la sá nna boquinna iqui ca nu lo gue ca benni quia ca nu israelita utticana Jesús.

<sup>54</sup> De nua nna larga güequi Jesús ule'e loe leni ca benni quia ca nu israelita. Beria ttebe lo yu lá Judea deyye gaxxaba daca lo yu bisi atta re ttu yiesi lá Efraín. Niaba güequie len ri'itu ca bi'ini rudheti nu rule'e.

<sup>55</sup> Atti chi deoba isia laní guetu ca nu israelita nu te lani pascua atti rado attu ida bodilá Tata Dios ca benniola guetuha

lo ná ca nu Egiptuha nna, ixeru benni se'e lhe'e adí ca yiesi diacana Jerusalén qui eyacacana nu nari lo Tata Dios attiba labicana runcana. <sup>56</sup> Lacana nna requicana reguilacana Jesús, atti reti'ia loescani leli'ia gue yotuha nna rinnaba tisa tteba loescani rácana:

—¿Bi raquinle? ¿Si güita chu nua laní aca, bittuba aca?

<sup>57</sup> Ca bixxudi anca nu loha lencana ca nu fariseo nna chi unnabiacana rácana ca benni, gansi nuxa ttu benni yuna gaxa requi Jesús nna quixxi'ia ttena qui tsiacana sadaxxucana benniha.

### María rigu'una seti ni'ia Jesús

**12** <sup>1</sup> A xxupa ubisa deoba isia laní pascua atti rado attu ida bodilá Tata Dios ca benniola guetuha lo ná ca nu Egiptuha nna, Jesús nna güie lhe'esi lá Betania atta do Lázaru bi'ini benie beaquinna dequi de chi uttina. <sup>2</sup> Ca benni se'e lhe'e lisi Lázaru bencana ttu rse qui go lencana Jesús. Marta nna riga'ana lhe'e ca platuha, Lázaru nna lana nua ttu ca nu do leni benniha ro'o mexaha go etta. <sup>3</sup> María nna bedaxxu ttebana attiba medi litru seti rure xixxi daca yaxi, nu anca ttaga'a gue ttu iyya te lani nardu, ulu'una ni'ia Jesús. Lenla nna leni itsiquibani nna bodibisna ca ni'ia benniha. Betú recha lhe'e yo'oha bebe tsi'i setiha. <sup>4</sup> Ttiaca Judas Iscariote, ttu nu sela guaba len ri'itu ca bi'ini rudheti nu rule'e Jesús, nu utenge las ná ca nu utticanḡha nna unnena rana:

<sup>5</sup> —¿Biacá lä bito'o seti rure xixxi-ni qui dhi ca benni bittu te guecane belhi gueni cumu gua daca bunna nu ridí ttu benni gue tsunna gayua ubisa sina?

<sup>6</sup> Judas nna laga gualínna de ca nu bittu te guecaniha nua runna rana anía. De ancabana ubana nna rana anía, de laguabana denna beduti yu'u belhi guetuha lhe, lana nna rudaxxu sigábana belhi ru'u lhe'e nua. <sup>7</sup> Jesús nna reḡ na:

—Begüelhunna. Run bunna aná qui chi du tsea gansi chi bisia sá igatsia. <sup>8</sup> Ca benni bittu bi te guequinna nna ttu dia líba se'e cunna len lebi'i, ttiaca neti nna laga ttu dia lii dhoa len lebi'i.

<sup>9</sup> Ixeru ca benni quia ca nu israelita binacana dequi niaba do Jesús, lacana nna güia ttebacana nia. Laga sunru güegüia Jesús diacana, dia guabacana qui iláquinna Lázaru nu beni Jesús beaquinna attu libe dequi de chi uttina. <sup>10</sup> Ca nu lo gue

ca bixxudiha nna boquinna tteba iquicani utti guabacana Lázaru, 11 cumu de lo ni'ia gueni nna ixeru ca benni quia ca nu israelita chi biriescana len lacana. Ca unnua nna chi ria lecani Jesús.

### Jesús ute'e lhe'e yiesi Jerusalén

12 Ixeru benni güia laní nu te lani pascua atti rado attu ida bodilá Tata Dios ca benniola guetuha lo ná ca nu Egiptuha. Betteyú sá nna binacana chi da Jesús gue'e lhe'e yiesi Jerusalén. 13 Laniala nna uchúcana dina qui dhencana, atti biría ttebacana diacana esácana benniha ribesi'iacana rácana:

—¡Lu ancalu benni odilálu ri'itu! ¡Carbáru! ¡Lu ancalu benni udhelha Tata Dios! ¡Lu ancalu nu innabia ri'itu ca benni israelita-ni!

14 Jesús nna guatti'ie ttu burru to, nianna udo ttebe cu'ue nua, attiba ra lo ca sitsi gue Tata Dios:

15 ¡Bittu gasinle, lebi'i ca benni se'e lhe'e yiesi gue Sión-na!

Gualugüiarga, ni benni rinnabia gueleha dee na doe cu'ue ttu burru to.

16 Ri'itu ca bi'ini rudheti nu rule'e nna laga guadú letu gue nu raca lania. Dequi de liba chi beopi Jesús iyyabáha bele'e loe lee anque benni ra xxeni leni nna, lanialiba guadú letu iyába nu bedhacacana benniha chi dia lo ca sitsi gue Tata Dios, aníaba guate.

17 Ca benni use'e len Jesús begüiacana beaxie Lázaru atti yu'una lhe'e baa, benie beaquinna lhe, rixxi'iacana nu biláquinna. 18 Larcala nna biría ca benni gualedacana benniha, cumu binacana gue milagru xxeni benie. 19 Ca fariseo nna ra loescani:

—Urga xa, laga ridári lo unná. Gualugüiarga, iyá rechaba benni diacana denocana unná.

### Jesús rixxi'ie gattie

20 Lagüi gue ca benni dia Jerusalén qui udú xibicani lo Tata Dios sá laníha, sela ttu chupa ca nu griegu. 21 Ca unnua nna ubiga ttebacana atta du Lipi, bi'ini beaca lasbi yiesi te lani Betsaida nu re lo yu te lani Galilea, unnabacana lenbi rácan bi:

—Xa tata, raca letu ilentu Jesús.

22 Lipi nna güia ttebabi guayúbi Andrés, laniala nna irupabacabi güiacabi guattixxi'iaquinbi Jesús. 23 Jesús nna ree cana:

—Bisiaba ura neti benni unbiyuu da iyyabáha nna eyopia iyyabáha qui ule'e lo neti anca benni ra xxeni leni. 24 Neti nna gualíbatia ria le, gansi xua xuxtila nna bittuba tsu'ue lhi'iu yu qui gattie, delába usue qui e'eyu beotsi gue nna, tturba benniha eya'ana. Ttiaca gansi gattie nna qui e'eyu beotsi guee nna, lania nna xxenru xua xuxtila utee. 25 Benni raca xxattinna gue elha nabani te gueni yies lo yu-ni nna, unittiba nua elha nabani ralhana dhina iyyabáha, benni rerú iqui rerú leni elha nabani te gueni yies lo yu-ni nna aca banna ttu dia lii iyyabáha.

26 Gansi nuxa ttu benni raca leni acana nu ixútia nna, itana etenalhana neti. Unnua nna dhona atta dhoa. Nuxa benni rixúna lo sina quia nna Tata quia nna unie qui acana nu ra xxeni leni.

27 'Lora nnanna tte nna rudú guate juisiabana lasia. ¿Bila innía? ¿Si innía: “Tata, bodiláchi neti lo elha disa-ni”? Ttiaca nna de unnuala nna delha. 28 Tata, bele'e lo lu ancalu benni ra xxeni leni.

Laniala nna bieni tsi'i ttu benni unnee iyyabáha ree:

—Chiba bele'e loa neti anca benni ra xxeni leni. Nnanna nna ule'e loa attu libe neti anca benni ra xxeni leni.

29 Ca benni se'e nia nna bienbaquinna. Ttu lhécana nna rácana:

—Uyu'u be ba.

Adícana nna rácana:

—Ttu ingeliba ben-na unnee belise ben-na.

30 Jesús nna becabie ree cana:

—Laga lo ni'ia quionna bieni tsi'i-na, sinuqui lo ni'ia gueba leonna. 31 Nnanna nna bisiaba sá aca elha uxtisi gue ca benni se'e yies lo yu-ni. Nnanna nna bisiaba sá uria la Tata Dios nu xxegüi rinnabiana ca benni se'e yies lo yu-ni. 32 Ttiaca gansi chi ulhidhacana neti güetsaa lo ya crusi nna, lania nna iyába benni gaxia qui itacana len neti.

33 Leni ca tisa-ni nna runie tte dani benni gaxasná gattie.

34 Ca benni se'e nia nna becabicana guee rácana:

—Ri'itu nna yutu, lo ca sitsi rinnabia boca'ana Moisés len ri'itu nna ra, Cristuha nna tsaba dho benniha. Lu nna ¿biacala ralu dequi raca duelha ilhidhacana benni unbiyuu da iyyabáha

lo ya crusi? Ganna anía nna ¿Núla nua anca benni unbiyuu da iyyabáha ganna?

**35** Jesús nna reę cana:

—Nnanna nna gua dorba len lebi'i, neti anca xiani nu rudani lagüi guele, ttiaca attu sattirba. Larcala nna laca dorua lenle nna gua rudánru xiani-ni guele, gualdhá dhuti qui lä iyaxxuni ela-n le, cumu nu requi lhe'e atta chulha nna ni lä yu nua ga nua diana. **36** Gualtsia lele neti, benni anca xiani-ni, nnanna gua dorua len lebi'i, qui acale xi'ini benni anca xiani-ni.

Unnuaba ra Jesús nna deyya ttebe, becatsi tteba loe cana.

### Ca nu israelita nna bittu ria lecani Jesús

**37** Masquiba chi beni Jesús ixeru milagru aní lo ca benni nna bittu ria lecanie. **38** Aníaliba nna guaxxína uca nu ra ca tisa unne Isaías bi'ini unne ca tisa bete Tata Dios atti rabi:

Nurla ria leni gue nu rinnetu-ni, xa Tata.

Nurla rite denna gue nu xxeni ra le Tata Dios chi bele'enie cana lhe.

**39** De nua nna nuarca laga uca gue ca benni tsia lecani Jesús, cumu ráguaba Isaías lo ca sitsi-na:

**40** Tata Dios nna benie qui bittu iláquinna, benie qui aca alma guecani attiba iyya lhe, qui masquiba gua rugüiacana nna bittu iláquinna, masqui guaba te elha rieni guecani lhe bittu tte daquinna.

“Anía nna qui bittu eyequicana esíacana len neti, neti nna eyonia cana”, ra Tata Dios.

**41** Anía ra Isaías, cumu bilenbi anca Jesús benni ra xxeni leni. De nuala nna uttixxi'iabi gue benniha.

**42** Laquiga de nua nna, axta ca nu lo gue ca benni quia ca nu israelita nna ixerucana güia lecani. Ttiaca de rasquinna lo ca nu fariseo nna nuarca bittu rixxi'iacana aní lo benni, qui bittu cueacan cana ttu tsaba lhe'e ca yo'o atta rudhetitu ca tisa gue Tata Dios. **43** Cumu radirla lecani eya'an tsecana len benni, attichula len Tata Dios.

**44** Jesús nna unneę idisa reę:

—Benni tsia leni neti nna, laga sunru neti nua ria le nua, riaguaba le nua Tata quia benni udhelhe neti. **45** Benni rilenna neti nna, riláguabinna benni udhelhe neti. **46** Neti anca xiani, delha yies lo yu-ni qui iyába ca benni tsia lecani neti nna

bitturu tse'ecana atta chulha. <sup>47</sup> Ca benni iyienini ca tisa quia-ni nna bittu udocana tisa gue nna, laga neti unia elha uxtisi guecane qui tsia nitticana; cumu neti nna laga delha qui unia elha uxtisi gue ca benni qui tsia nitticana, delhaba neti qui odiláya cana. <sup>48</sup> Nu cu'u ni'iani neti nna bittu udo nagani gue nu ria nna, gua teba nu unna tsia nitti nua. Ca tisa chi unnea-ni ba unque tsia nittina gansi chi bisia sá lhuxa. <sup>49</sup> Cumu neti nna laga nu anca quia rinnea, Tata quia benni udhelhe netiha benniha ba ree neti bixa innea lhe quixxi'iaya lhe. <sup>50</sup> Neti nna yua, ca tisa gue-ni nna ancaque benni rute elha nabani ttu dia lii. Larcala nu rpea le-ni nna rixxi'iaba attiba ra Tata quiaha neti innea.

### Jesús rigué ni'ia ca bi'ini rudheti nu rule'e

**13** <sup>1</sup> Deoba laní te lani pascua atti rado attu ida bodilá Tata Dios ca benniola guetuha lo ná ca nu Egiptuha nna, Jesús nna yube chiba bisia ura atti edee yies lo yu-ni qui esine atta do Tata gueha. Attiba ucanie gue ca benni guee se'e yies lo yu-ni nna, aníaba ucanie gue ca bi'iniha axta atti bisia sá uttie. <sup>2</sup> Atti chi do Jesús len ri'itu ca bi'ini rudheti nu rule'e go rse nna, nu xegüiha nna chila uxí yiena Judas Iscariote xi'ini Simoni, qui utene las ná ca nu utticane. <sup>3</sup> Jesús nna yube iyába chi bete Tata gueha las nee, atta do benniha ba birie dee yies lo yu-ni lhe niaguaba esine lhe. <sup>4</sup> Lee nna udú líttebe utúe lari nucueha, bedaxxu ttebe ttu lari bexxica lhe'e. <sup>5</sup> Atti uta'a ttebe inda lhe'e ttu xiga xeni, nianna udulo ttebe utíe ni'iatu ca bi'ini rudheti nu rule'e. Leni lari xica lhe'e benniha nna rodibisie ni'iatu. <sup>6</sup> Atti die quie ni'ia Simoni bi'ini láguaba Betu nna, bi'iniha nna ra ttebabi:

—¿Si lu quilu ni'iaya, tata?

<sup>7</sup> Jesús nna becabie ree bi'iniha:

—Nnanna nna laga radú lelu nu runia-ni, lenla nna guasadúba lelu.

<sup>8</sup> Betu nna rabi benniha:

—¡Locachirba ugüelha lu quilu ni'iaya!

Jesús nna becabie ree:

—Gansi bittuba quia ni'ialu nna, laga acalu benni quia.

<sup>9</sup> Simoni bi'ini láguaba Betu nna rabi benniha:

—Ganna anía nna, xa tata, bittu sunru ca ni'iaya-ni quilu, quíguabalu iquia lhe ca náya lhe.

10 Jesús nna becabie reg:

—Ttu benni chiba udina, laga bi reasin nua gadina attu libe. Asuna ni'iaba nua eyari, cumu itúba nua chi anca nari. Lebi'i nna chiba ancale nari lo Tata Dios, masquiba lä iyále.

11 Lee nna yube núxcan nua utecane las ná ca nu utticane, nuarcala reg: “Laga iyále chi ancale nari.”

12 Dequi de utíe ni'iatu nna, beocu ttebe lari rucueha atti bedo ttebe ro'o mexaha, nianna ra ttebe ri'itu:

—¿Si guadú lele bi diale nu benia-na? 13 Lebi'i nna rale neti anca benni rule'enie le, benni bananie le lhe. Gualíbinle, cumu unnua ba anca. 14 Ganna anía nna neti ancala benni baninna le lhe benni rule'enie le lhe nianna utía ni'iale, anáguaba lebi'i nna labiaba quii ni'ia loesle. 15 Neti nna chi bele'ea gaxasná unle qui niachu nna lebi'i nna unle atti benia len lebi'i. 16 Neti nna gualíbatia ria le, ni ttu benni reni sina bittu ancana nu ra xxeniru leni attichula benni bananie na, niguaba ttu benni racana mandadu lhe laga anca nua nu raru xxeni leni attichula benni ridhelhe na gaxa tsiana. 17 Lebi'i ca benni chi yuu unnii, carbárule gansi udole tisa unle na.

18 'Laga iyáleonna rpea le aná, neti nna gua yuba núpaxale chi becuea. Ttiaca nna labiaba saxxína aca nu ra lo ca sitsi gue Tata Dios, atta ra: “La nu ro yetta len netiha ba bequi nona



neti.” 19 Nnannali chi rixxi'iatia le antisla acunni, qui gansi chi ucana nna lebi'i nna tsia lele, neti nna anca nu chi ria le anca. 20 Neti nna gualíbatia ria, benni ulabina benni idhelha nna netiba nua rulabi nua; benni ulabina neti nna benni udhelhe netiha ba benniha rulabina.

**Jesús rixxi'ie, Judas ba nua utene las ná ca nu utticane**

21 Dequi de ra Jesús anía nna, bedú guate ttebana lee, nianna ree:

—Neti nna gualíbatia ria, len lebi'i sela nu utena neti las ná ca nu utticana neti.

22 Ri'itu ca bi'ini rudheti nu rule'e nna udulo ttebatu begüia lo loestu, ni lä yutu nu gue nua rinne benniha. 23 Neti, benni raca xxattani Jesús gueni nna doa cuitta benniha. 24 Simoni bi'ini láguaba Betu nna bele'e ttebinbi neti senni qui innaba tisa benniha nuxa nua ree uni anía. 25 Neti nna ubiga tteba gaxxa cuitta Jesús, nianna unnaba tisa ttebe rpe:

—Tata, ¿nútu nua?

26 Jesús nna ra ttebe:

—Nu ugüea ttaxtila odibidha-ni, unnua nua.

Laniala nna bodibidhe ttu pedasu ttaxtila begüee Judas Iscariote xi'ini Simoni. 27 Dequi de uto nua ttaxtilaha nna uta'a tteba nu xxegüiha lhe'eni. Jesús nna ree na:

—Nu chi re lelu unlu nna, tsala ben nua.

28 Ttiaca ni ttu ri'itu ca bi'ini sia ro'o mexaha, lä guadú letu biaca ra benniha anía. 29 Judas galá denna beduti yu'u belhi, nuarcala ttu lhétu nna uquintu ga raba Jesús nua tsiana sayo'ona nu reasintu gue laní o ugüena ca benni bittu te guecani ttu latti belhi. 30 Dequi de chi uto Judas ttaxtila begüe benniha na nna, biría ttebana. Lo relaba chi anca lania.

**Jesús rutee attu tisa rinnabia cubi  
len ca bi'ini rudheti nu rule'e**

31 Dequi de chi biría Judas nna, Jesús nna ree:

—Nnanna nna ule'e lo anca nu ra xxeni leni, neti benni unbiyuu da iyyabáha, de neti nna ule'e lo anca Tata Dios benni ra xxeni leni lhe. 32 Ganna neti runia rule'e lo anca Tata Dios benni ra xxeni leni nna, anáguaba benniha, unguabe qui ule'e lo anca nu ra xxeni leni. Chi tte deoba unie nua. 33 Xi'in to quia, attu sattirba doa len lebi'i. Lebi'i nna eguilale neti. Nnanna nna

upea le attiba rpea ca nu lo gue ca benni gueri ca nu israelita-na: Lebi'i nna bittu aca edále atta eya'aya. <sup>34</sup> Ttu tisa rinnabia cubi utea len lebi'i: aquin gue loesle. Attiba ucatia guele, anía aquin gue loesle. <sup>35</sup> Gansi aquin gue loesle nna, iyába ca benni tte daquinna gualíba ancale benni bedheti nu bele'ea.

**Jesús rixxi'ie, Betu nna bittu dhi ro'obi  
gualí anca bienbi benniha**

<sup>36</sup> Simoni bi'ini láguaba Betu nna unnaba tisabi Jesús rabi benniha:

—¿Gala tsialu, xa Tata?

Jesús nna becabie reę:

—Lu nna laga aca edálu atta eya'aya nnanna, lenla nna esíaguabalu atta deya'aya.

<sup>37</sup> Betu nna rabi benniha:

—¿Biaca bittu aca etā lenlu, tata? ¡Neti nna chiba berú iqui berú lasia elha nabani quia utea cuenta guelul!

<sup>38</sup> Jesús nna reę:

—¿Si gualíguinlu erú iqui erú lelu elha nabani guelul utelu cuenta quia? Cumu neti nna gualíbatia ria; niba lati ixzá ro'lo berudiha nna, lu nna chila beyonna libe bittu ridí ro'olu gualí anca bienlu neti.

**Jesús anque neda dia atta do Tata Dios**

**14** <sup>1</sup> Jesús nna reę ri'itu ca bi'ini rudheti nu rule'e:

—Bittu aca guatenle. Gualtsia lele Tata Dios, gualtsiaguaba lele neti lhe. <sup>2</sup> Lhe'e lisi Tata quia do iyyabáha nna ixé atta tse'e benni sia nia. Gansi läba anía anca nna, laga bi upea le aní. Nnanna nna eya'aya qui sen tsea atta tse'ele.

<sup>3</sup> Dequi de eya'aya sen tsea atta tse'ele nna, dedáya attu libe qui echea le len neti, qui tse'eguabale atta dhoa. <sup>4</sup> Lebi'i nna chiba anca bienle neda dia atta eya'aya.

<sup>5</sup> Maxi nna rabi Jesús:

—Laga yu ri'itu gaxa eyyalu, xa Tata. Larcala nna, ¿tti modu yutu bixa neda nua?

<sup>6</sup> Jesús nna becabie reę:

—Neti ba nuha anca neda dia atta do Tata Dios. Anca nu rule'e nu anca gualí lhe anca nu rute elha nabani ttu dia lii lhe. Ni ttu benni bittu aca gueni isinna len Tata quia gansi läba neti unia isinna len benniha. <sup>7</sup> Gansi lebi'i chi anca bienle

neti nna, chiguaba anca bienle Tata quia. Nnannali chi anca bienle, cumu benniha bunni rugüiale.

**8** Lipi nna rabi:

—Tata, bele'en ri'itu Tata gueriha, care'eaba nua nna uca tte.

**9** Jesús nna becabie ree:

—Isá chi uca requia len lebi'i nna, ¿si itú ttuali nna bittu chi yulu nuxa anca, Lipi? Benni chi bilenna neti nna, chiguaba bilen nua Tataha. ¿Gasná nua nna lu nna ralu: “Bele'en ri'itu Tataha”? **10** ¿Si läba gua ria lelu neti nna ttuba benni anca lenia Tataha, Tataha nna ttuba benni anca lenie neti? Ca tisa rinnea-ni nna laga nu anca quionni rinnea, nu anca gue Tata Dios benni yu'u lhe'e alma quia-ni ba ben-ni rinnea. Labe runie ca milagru runia. **11** Gualtsia lele, neti nna ttuba benni anca lenia Tataha, Tataha nna anque ttuba benni lenie neti. Gansi bittuba nna, ladiba gue nu rilenle runia gualtsia lele. **12** Neti nna gualíbatia ria, nu tsia leni neti nna unguabana ca nu runia-ni. Nu xxenrula unna, cumu neti nna eya'abā atta do Tata quia. **13** Iyába nu innabale len Tataha rudettile neti nna, gunbā nua, qui anáchu neti xi'ini Tata Dios nna de nu runia-ni nna ule'e lo anca benniha benni ra xxeni leni. **14** Bixaba innabale rudettile neti nna, gunbā nua.

### Jesús rucan yienie idhelhe Espíritu gue Tata Dios

**15** 'Gansi lebi'i raquinle quia nna, gudobale tisa gue ca tisa runia le mandadu unle. **16** Neti nna güinnababā lo Tata quia qui idhelhe attu benni aca lenie le, qui dhoe len lebi'i ttu dia lii. **17** Benniha nua Espíritu gue Tata Dios, benni rule'enie le nu anca gualí. Ca benni se'e yies lo yu-ni nna laga aca ulabicana benniha, cumu laga anca biauquina benniha, niguaba lä riláquinnē lhe. Ttiaca lebi'i nna chiba anca bienle ben-na, cumu len lebi'iba doe, dhoe lhe'e alma guele lhe. **18** Laga oca'an neti le attiba ttu bidabi, esíaba neti qui dhoa len lebi'i. **19** Chi tte deoba bitturu ilani ca benni se'e yies lo yu-ni neti, lebi'i nna güilábinle neti. De anca bania nna lebi'i nna guaca banguale. **20** Gansi chi bisia sá aca nu ria-ni nna, lania nna tte denle neti nna ttuba benni anca leni tata quia, lebi'i nna ancale ttuba benni leni neti, neti nna anca ttuba benni len lebi'i. **21** Benni chi bieninna ca tisa runia le mandadu unle-na lhe ucona tisa guequē lhe unnua nua gualíguinna raquinna quia. Benni raquinna quia nna Tata quia nna acanie gueni.

Anáguaba neti aca guabatia gueni, ule'e loa len lana nuxa ancā lhe.

22 Judas nu bittu lá Iscariote nna ranę:

—Tata, ¿biaca sun tteba len ri'itu ule'e lolu nuxa ancalu, bittu ule'e lolu leni iyá ca benni nuxa ancalu?

23 Jesús nna becabie reg:

—Benni raquinna quia nna, udoba nua tisa gue ca tisa quia-ni. Tata quia nna guaca banie gueni. Tata quia lenie neti nna itatu tsu'utu lhe'e alma gueni. 24 Nu bittu raquinna quia nna, laga rudo nua tisa gue nu rixxi'iaaya. Ca tisa rieninle rinnea-ni nna laga nu anca quionni, nu anca gue Tata quia benni udhelhe netiha bunny rinnea.

25 'Iyábunni rixxi'iatia le nnanna doa len lebi'i. 26 Ttiaca benni aca lenie leha, delába Espíritu idhelha Tataha cuenta quia, benniha ule'enie le iyába, orexxę lele iyá nu chi rpea le lhe.

27 'Neti rutea elha xen lasi lenle. Elha xen lasi rutea lenle-na bittu ancana loesi elha xen lasi rute ca benni se'e yies lo yu-ni. Nuarca bittu aca guatenle, lä gasguabinle lhe. 28 Laa chiba bieninle ria: “Eyya'abā, lenla nna esíaya qui dhoa len lebi'i attu libe.” Gansi gualíguinle raquinle quia nna, rana be'eo juisia lele atti rpea le: “Eyya'aya atta do Tata quia”, cumu benniha anquē benni raru xxeni leę atti neti. 29 Nnannali chi rixxi'iatia le, qui gansi chi uca nu ria-ni nna tsia lele.

30 'Larga bitterga isá rinne lania le, cumu nu xxegüi rinnabia ca benni se'e yies lo yu-ni nna chi dana, masquiba laga unnu rinnabiana neti 31 Ttiaca anába te aca, qui tte dani ca benni, neti nna racatia gue Tata quia, runia nu reę neti unia.

'Gualdhú lí. Gualtsá.

### Jesús anquē attiba ttu ya uva tse

**15** 1 Jesús nna reg:  
—Neti ancā attiba ttu ya uva tse. Tata quia nna anquē benni rapē na. 2 Iyába ca xiqui ya uva bittu ribia guecani nna riguabē cana. Iyába ca nu ribia guecani nna richúe locani lhe rigüe nu bisi guecani lhe qui cuia chieti guecani. 3 Ca tisa chi utixxi'iatia le-na ba chi benquē acale benni nari lo Tata Dios attiba ttu yaga ritua nu bisi gueni. 4 Attiba dua len lebi'i, anía gualtse'e len neti. Attiba ttu ná yaga, gansi bittuba yaxxu nua yagaha nna laga aca ute nua nu xixxi. Anáguaba lebi'i, gansi bittuba se'ele len neti nna laga aca unle nu tsee.



5 'Neti anca ya uva, lebi'i nna ancale ca ná ya uva. Nu gua duna len neti nna gua duguaba len lana, unnua nna cuia juisia gueni. Tsa laga aca guele unle ttu bixa gansi bittuba dua len lebi'i. 6 Ca nu bittuba se'ecana len neti nna, iriaba ca nua iru'unacana. Ancacana attiba ca ná yaga dequi de chi ribiscana nna rediga tteba benni cana qui tsiacana lo gui itecana.

7 'Gansi gua se'ele len neti lhe bittu ixulhinle nu ra ca tisa quia-ni lhe, lania nna bixaba raca lele, gualnnaba nna guadí bale nua. 8 Tata quiaha benniha runle rule'e lo anque benni ra xxeni lee, ganna unle nu anca tse, attiba ttu yaga ribia xxatta gueni, análiba nna ule'e lo lebi'i rguaba nna gualíga ancale benni rudheti nu rule'eha. 9 Neti nna racatia guele attiba racani Tataha quia. Lebi'i gualtse'e gualusigui len neti benni racatia guele. 10 Gansi gudole tisa gue ca tisa benia le mandadu unle-na, lania nna guase'ele len neti, benni racatia guele, attiba neti rudoa tisa gue nu beni Tata quia neti mandadu unia nna dua lanie nna lee nna racanie quia.

11 'Anába rpea le, qui ebe itta lele itupa lenle neti, análiba nna edaca lele itú iqui itú lele. 12 Unnii anca tisa rinnabia quia: aquin gue loesle attiba ucatia guele. 13 Ni ttu benni bittu racaruinna gue ca benni se'e tse lenna atti ttu benni dhielhana uttican na qui lha ca benni se'e tse lenna. 14 Lebi'i ancale ca benni se'e tse lania gansi udole tisa unle nu chi rpea le unle. 15 Larga upea le benni ribeni lo sina quia, cumu nu reni sinaha nna laga yu nua gaxasná anca gue nu baninna na.

Benni se'e tse len neti ba upea le nnanna, de chi bele'etia le iyába nu biná ra Tata quia. **16** Laga lebi'i becuele neti, neti liba becuea le. Chi bose'ea le qui tsiale unle nu tsee attiba ttu yaga ribia xxatta gueni, delába quixxi'ienle ca benni ca tisa quia-ni, ca benni iyienini ca tisa quia-ni nna tse'e tsitsicana lo neda quia. Tata quia nna gutebe iyá nu innabale lenie udettile neti. **17** Unní rodha'ana unle: aquin gue loesle.

**Ca benni bittu ria lecani Jesús bittu aca  
uyúcana ca benni ria lecani benniha**

**18** Jesús nna reę:

—Gansi ca benni ca nu bittu ria lecani neti se'e yies lo yu-ni bittu aca uyúcana le nna, gualodhá lele primerla neti bittu uca uyú cunna. **19** Ttirca ancarle benni baba len lacana nna, lania nna guacabaquinna guele attiba racaquinna gue ca benni baba len lacana. Ttiaca lebi'i-na larga ancale benni baba yies lo yu-ni. Neti nna chi becuea le lhe'e ca benni baba yies lo yu-ni. Nuarca nna bittu raca uyúcana le. **20** Gualorexsa lele gue nu chi rpea le: “Ni ttu benni reni sina bittu ancana nu ra xxeniru leni atti benni bananie na.” Gansi neti besía le cunna nna anáguaba lebi'i usiaguaba le cunna le. Gansi bedo nagacani gue nu ria nna, udoguaba nagacani guele. **21** Iyonni udhacacan le lo ni'ia quia de ria lele neti, cumu bittu anca biaquinna benni udhelhe neti. **22** Ttirca bittuba bisiaya yies lo yu-ni lhe bittuguaba belisá cana lhe, lania nna laga bi dia nitti cunna, cumu laga yu cunna gansi runcana nu lä anca tse. Ttiaca nnanna nna tsa bittu te ro'ocani innácana: “Bittu yutu gansi runtu nu lä anca tse.” **23** Nu rutia di leni neti nna, rutia diguaba le nua Tata quia. **24** Ttirca bittuba benia ca milagru nu tsa nuttu nu chi beni aní locani nna, laga bi yua nujacana gue nu lä anca tse runcana, ttiaca nnanna nna chi biláquinna nu benia. Läqui ga de unnua nna, lacana sa tica rutia diru lecani neti lhe Tata quia lhe. **25** Anába chi ga'ana aca, qui saxxína nu chi dia lo ca tisa rinnabia gue Tata Dios se'e len lacana atta ra: “Locachirba bi lo ni'ia gueę nna xalha tteba betia di lecani neti.”

**26** 'Neti idhelhā benni aca lanie le, delába Espíritu benni rule'e nu anca gualí. Benniha nna atta do Tata Dios li irie deg. Lee quixxi'ie nuxa anca. **27** Anáguaba lebi'i lhe, quixxi'iaguale quia, cumu atti uduloa bele'etia ca benni li chi se'ele len neti.

**16** <sup>1</sup> Rixxi'iatia le unnii, qui tse'e tsitsile, bittu odha'anle ria lele neti gansi chi bixa guatele. <sup>2</sup> Lebi'i nna ebea ca benni le lhe'e ca yo'o atta ritupari rudhetiri ca tisa gue Tata Dios, isia sá nna nuxaba uttin le nna aquinna sina gue Tata Dios ba nua runna, runna anía. <sup>3</sup> Anía uncana, cumu bittu anca biauquina Tataha, niguaba neti. <sup>4</sup> Rixxi'iatia le unnii, qui gansi chi bisia sá satele aná nna, lania nna exxa lele, neti nna chiba utixxi'iatia le nu satele.

### **Espíritu gue Tata Dios ule'enie ca benni nu anca gualí**

Jesús nna reę:

—Laga utixxi'iatia le unnii primeruha, cumu len lebi'i ba doa. <sup>5</sup> Nnanna nna chi eya'aya atta do benni udhelę neti, lebi'i nna niba ttule bittu rinnaba tisale neti innále: “¿Ga eyyalu?” <sup>6</sup> Ttiaca se'e si'ilale de utixxi'iatia le nu rpea le-ni. <sup>7</sup> Neti nna rpeba le nu anca gualí: tserla salianale eya'aya, cumu gansi bittuba eya'aya nna laga isia Espiritu benni aca lenie le. Ttiaca gansi eya'aya nna, lania nna idhelę benniha len lebi'i. <sup>8</sup> Gansi chi bisia benniha nna, unie tte dani ca benni bittu ria lecani Tata Dios se'e yies lo yu-ni nuxa nua nuja yua gue nu lä anca tse runcana, nú nua runi nu anca tse lo Tata Dios lhe nú nua satena lo elha disa ute Tata Dios gansi chi benie elha uxtisi guecani lhe. <sup>9</sup> Unie tte daquinna lacana ancacana nu nuja yua gue nu bittu anca tse runcana de bittu ria lecani neti. <sup>10</sup> Unie tte daquinna neti anca benni runi nu tsee lo Tata Dios. De nua nna chi deya'aya atta doe, lebi'i nna larga nurua neti ilenle. <sup>11</sup> Unie tte daquinna, lacana nna dhíbacana elha disa ute Tata Dios cumu nu xzegüi rinnabia yies lo yu-ni nna chiba beni Tata Dios elha uxtisi gue nua qui tsiana atta uyúna elha disa.

<sup>12</sup> 'Ixeru nu tetia upea le, ttiaca nnanna nna laga sadú lele nu innía. <sup>13</sup> Gansi chi bisia Espiritu gue Tata Dios benni rixxi'ia nu gualí, benniha ule'enie le iyá nu anca gualí, cumu laga nu anca gue benniha innee, nu iyienbani benniha inná Tata Dios innee, quixxi'ienie le iyába nu chi da aca lhe. <sup>14</sup> Benniha nna unie ule'e lo anca benni ra xxeni leni, cumu dhie nu anca quia nna quixxi'ienie le. <sup>15</sup> Iyába nu anca gue Tata quia nna quiba anca nua. De nuala nna ria, Espirituha nna dhie nu anca quia qui quixxi'ienie le.

### Nu tse'e si'ileha nna eyacana nu unna edaca lele

16 Jesús nna ree:

—Larga birua ttega isá nna, nutturu neti ilenle, bittuguaba isá ttega aca nna chi edelenle neti attu libe.

17 Ttu lhétu ca bi'ini rudheti nu rule'e Jesús nna unnaba tisa tteba loestu ratu:

—¿Bi diani nu ra ben-na: “Larga birua ttega isá nna nutturu neti ilenle, bittuguaba isá ttega aca nna chi edelenle neti attu libe”? ¿Bi diani nu ra ben-na: “Eyya'aya atta do Tata quia”?

18 Ri'itu nna ra loestu:

—¿Bi diani nu ree: “Larga birua isá”? Laga rite denri bi gueonna rinnee.

19 Jesús nna ute da ttebanie rdacatu innaba tistue. Laniala nna ree ri'itu:

—¿Si rinnaba tisa loesle gue bixa diani nu ria: “Larga birua ttega isá nna nutturu neti ilenle, bittuguaba isá ttega aca nna chi edelenle neti”? 20 Neti nna gualíbatia ria, lebi'i nna cuesle lhe tse'e si'ile lhe gue nu satea, laca ca benni se'e yies lo yu-ni nna eyo'o lecani. Ttiaca masquiba tse'e si'ile, lenla nna edaca lele. 21 Gansi chi deoba gali unto gue ttu nuila nna si'irurba runna, cumu chi bisia ura gueni. Ttiaca dequi de chi uli untoha nna, tsa rixulhin nua gue elha disa biyúna, cumu chi re'eola le nua de bisia attu benni yies lo yu-ni. 22 Anáguaba lebi'i, ttu nnanna bunna se'e si'ile, neti nna güetaba ettegüiaya le, lania nna eyo'o juisia lele. Unnua ancana ttu redaca lee guele nu tsa nuttu nu dhana cuana. 23 Gansi chi bisia la sá nna, larga birua innaba tisale neti gue ttu bixa. Neti nna gualíbatia ria, iyába bixa innabale leni Tata quia rudettile neti nna gutebe nua len lebi'i. 24 Axta nnanna laga bi chi unnabale lenie udettile neti. Gualnnaba nna guadíbale, qui edaca lele itú iqui itú lele.

25 'Iyába nu ria-ni nna rinnea-na leni tisa raxxína nu diani nu raca lasia upea le, ttiaca chi isia sá nna bitturu innea aná len lebi'i, sinuqui lhixxa su innea quixxi'iatia le gue Tataha. 26 Gansi chi bisia sá nna, larga neti innaba guele lo Tataha, lebi'iba nna innabale lenie udettile neti. 27 Cuinaba Tata quia racanie guele cumu lebi'i nna raquinle quia, de güia lele neti nna biríaya atta doe delha nii. 28 Atta do Tataha biríaya delha yies lo yu-ni. Nnanna nna odha'ana yies lo yu-ni qui eya'aya atta do Tataha.

29 Laniala nna ratu Jesús ri'itu ca bi'ini rudheti nu rule'e:

—Nnannarguaba nna rinnelu lhixxa su, bitturu rinnelu leni tisa nu raxxína dia le nu raca lelu innálu. 30 Nnannarguaba chi yutu lu nna iyába chi yulu. Tsa laga bi reasinlu innaba tisatu lu. De nuala nna nuarca yutu, lu nna atta do Tata Dios ba dalu.

31 Jesús nna becabie guetu ree:

—¿Si gualíga ria lele nnanna? 32 Uraha nna chiba da nua ribigana, chiba bisia ura atti isatsa lhe'e loesle, coa ttuttubale udaxxu neda guele gaxa ladu tsiale, atturbá oca'anle lania.

Ttiaca laga tturu neti dua, gua duba Tata quia len neti.

33 Iyonna rixxi'iatia le qui edíle elha xen lasi rutea len le, de chi ancale benni baba len neti. Yies lo yu-ni nna satele uyúle elha disa. Lebi'i nna tsitsi gualcuequi lele, cumu neti nna udábá bedú ni'iaya iqui nu lä anca tse gue yies lo yu-ni.

### Jesús rinnabę len Tata Dios aca lenie ca bi'ini rudheti nu rule'e

**17** 1 Dequi de unne Jesús ree iyába unnii nna ulhidha tteba loe begüie iyyabáha, nianna ree:

—Tata, nnanna nna chiba bisia ura. Beni qui ule'e lo neti xi'inlu-ni ançá nu ra xxeni leni, qui anáguaba neti nna unia qui ule'e lo lu ancalu benni ra xxeni leni. 2 Lu nna chi benlu açá nu innabia iyá ca benni, qui utea elha nabani gatta ttu dia lii gue iyá ca benni chi betelu len neti. 3 Guattaba elha nabani ttu dia lii gue ca benni gansi un biacana lu, lu nna tturbalu dolu gualíga ancalu Dios, un bia guabacana neti, neti nua Jesús benni ançá Cristu udhelhaluha. 4 Neti nna chiba benia bele'e lo yies lo yu-ni lu ancalu benni ra xxeni lee, chiba uluxatia sina betelu unia lhe. 5 Nnanna nna, Tata, beni qui eyaçá benni ra xxeni leni lolu attiba ançá doa lenlu atti bittu yies lo yu-ni chi reha.

6 'Ca benni becuelu lhe'e ca benni se'e yies lo yu-ni betelu len neti nna, chiba utixxi'iatia cana nuxa ancalu. Guebalu ancacana, lu nna betelu cana len neti, lacana nna rudocana tisa gue ca tisa guelha. 7 Nnanna nna chiba yucana, iyába nu betelu len neti nna guebalu nua 8 cumu utixxi'iatia cana ca tisa betelu len neti, lacana nna bedoba nagacani gue nu ra ca tisa guelha. Chiba yucana atta dolha ba biríaya daya, chiguaba güia lecani luba udhelhalu neti lhe.

9 'Gue ca unní rinnabā lolu, laga gue ca nu bittu ria lecani lu rinnabā. Rinnabā gue ca nu betelu len neti, cumu guebalu ancacana. 10 Iyába nu anca quia nna guebalu nua, nu anca guelu nna quibā nua. Ca unná runcana rule'e lo ançā benni ra xxeni leni. 11 Neti nna larga dhoa yies lo yu-ni, ttiaca ca unní nna tse'erba cunni yies lo yu-ni. Laca neti nna dedáya atta dolha, xa Tata do riesi len nu lä anca tse, ca benni betelu len neti nna upa chi cana leni elha ra xxeni le guelha, qui tse'ecana acacana ttuba benni attiba ri'i ancari ttuba benni. 12 Atti doa lencana yies lo yu-ni nna, netiba rapā lhe redía lhe ca nu betelu len neti leni elha ra xxeni le guelu. Ni ttucana bittu dia nitti, suna ttuba nu chi ga'ana tsia nittiha dia nittina, qui guaxxína uca nu chi ga'ana aca, attiba ra lo ca sitsi guelha.

13 'Nnanna nna dedábā atta dolha. Laca sna doa yies lo yu-ni nna rinnea ria aní, qui edaca lecani itú iqui itú lecani attiba neti redaca lasia itú iqui itú lasia. 14 Neti nna chiba utixxi'iatia cana ca tisa guelha, ttiaca ca benni bittu ria lecani lu se'e yies lo yu-ni nna bittu raca uyúcan cana cumu de bittu ancacana benni baba yies lo yu-ni, attiba neti bittu ançā benni baba yies lo yu-ni. 15 Laga rinnabā lolu cual cana yies lo yu-ni, rinnababā lolu gapal cana qui bittu bi udhacani nu xxegüiha cana. 16 Laga anca cunni benni baba yies lo yu-ni, attiba neti bittu ançā benni baba yies lo yu-ni. 17 Bele'e quinna nu gualí rixxi'ia ca tisa guelha qui iriesicana acacana guelu, cumu ca tisa guelha ancaque nu gualí. 18 Attiba udhelhalu neti yies lo yu-ni, anáguaba idhelhā cana tsiacana atta se'e ca benni se'e yies lo yu-ni. 19 De lacana nna la netiba ririesía utea elha nabani quia cuenta guecani, qui anáguaba lacana iriescana acacana guelu, de ria lecani nu gualí.

20 'Laga sunru gue ca unnii rinnabā lolu, rinnaba guabā gue ca nu tsia lecani neti gansi chi biyienquinna ca tisa quixxi'ia ca unnii. 21 Rinnabā lolu qui ttuba ese'e iyábacana, attiba lu, xa Tata, ttuba benni ancalu len neti, neti nna ttuba benni ançā lenlu. Anáguaba lacana eyacacana ttuba benni len ri'i, qui anáchu tsia le ca benni se'e yies lo yu-ni lu udhelhalu neti. 22 Neti nna chiba benia qui acacana nu ra xxeni leni, attiba lu benlu ançā benni ra xxeni leni, qui acacana ttuba benni attiba lu len neti ttuba benni ancari. 23 Lu nna dulu len neti. Neti nna dhua lencana, qui dhácana e'eyucana acacana benni se'e

ttuba. Aníaliba nna tte dani ca benni bittu ria lecani lu, gualíba lu udhelhalu neti, raquinlu guecani attiba raquinlu quia lhe.

24 'Ca benni chi betelu len neti, xa Tata, raca lasia tse'e guabacana len neti atta dhoa, qui iláquinna nu xxeni ra lasia chi betelu len neti, cumu antisla cue yies lo yu-ni chi raquinlu quia. 25 Tata, lu ancalu benni runi nu raxxína anca lhixxa. Ca benni bittu ria lecani lu se'e yies lo yu-ni nna laga anca biaquinna lu, ttiaca neti nna anca biabatia lu. Ca benni se'e len neti nii lhe chiba yucana luba udhelhalu neti. 26 Chi utixxi'iatia cana nuxa ancalu, sna quixxi'iarguabatia cana adí lhe, qui aná chu attiba raquinlu quia nna aníaguaba aquin gue loesicani, neti nna dhua lencana.

### Bedaxxucana Jesús

**18** 1 Dequi de unne Jesús iyába nu chi unne-ni nna, biría ttebe die len ri'itu ca bi'ini rudheti nu rule'e attu ladu gue lidhá te lani Cedrón. Nia nua te ttu lo yu da ca ya olivu loni. Lhe'e nua nua uta'a Jesús lenie ri'itu ca bi'ini rudheti nu rule'e. 2 Judas nu utene las ná ca nu utticaneha nna, chiba anca bia sábinna nia, cumu Jesús nna ixé liberu güia lenie ri'itu ca bi'ini rudheti nu rule'e nia. 3 Larcala nna Judas nna bisin tteba lenna ca suldadu lhe ca güen sina gue yotuha lhe. Ca unnua udhelha ca bixxudi loha lencana ca fariseo. Lacana nna nujacana macheti lhe yaga lhe quinque lhe ca yaga ralha iquicani lhe. 4 Cumu Jesús nna chiba yue iyába nu sate, nianna biría ttebe die guatse cana ree cana:

—¿Nú reguilale?

5 Lacana nna rácana:

—Jesús gue Nazaret.

Jesús nna ree cana:

—Neti ba nua.

Len ca unnua guaba du Judas nu utene las ná ca nua. 6 Atti ra Jesús cana: “Neti ba nua”, lacana nna beadi ga ttebacana ubixxi locana lo yu. 7 Lee nna bedennaba tise cana attu libe ree cana:

—¿Nú reguilale?

Lacana nna bedecabicana rácana:

—Jesús gue Nazaret.

8 Jesús nna ree cana attu libe:

—Laa chiba rpea le: “Neti ba nua” nna, gansi neti regulale nna, gualgüelha eyya ca nu se'e ni ganna.

<sup>9</sup> Anía uca qui guaxxína tisa nu la laba Jesús unnee, atti ree Tata Dios: “Tata, ni ttu ca benni betelu len neti bittu bedelha.” <sup>10</sup> Laniala nna ulea Simoni bi'ini láguaba Betu espada denbiha lhe'e xoni, uchúbi naga derechu gue ttu unbiyuu te lani Malcu. Unnua nua anca nu ribeni sina gue bixxudi xeni rinnabiaha. <sup>11</sup> Jesús nna ree Betu:

—Boga'a espada-na lhe'e xoni. Elha disa rute Tata quia len neti nna ¿biaca lä dhielha satea-na?

### Uchecana Jesús bedúcane lo bixxudi lo lá Anás

<sup>12</sup> Ca suldaduha lencana nu lo guecaniha lhe ca güen sina gue yotuha lhe bedaxxucana Jesús, atti bexxica ttebacane.

<sup>13</sup> Lo tteba lo Anás uchecane, cumu unnua anca tata gue nuila gue Caifás nu anca bixxudi xeni rinnabia la ida. <sup>14</sup> Caifás-ni nua rana ca nu lo gue ca benni quia ca nu israelita, tseba anca len lacana gatti ttuba benni cuenta gue iyába ca benni.

### Betu bittu ridí ro'obi anca bienbi Jesús

<sup>15</sup> Simoni bi'ini láguaba Betu lenbi attu bi'ini rudheti nu rule'e Jesús nna denobacabi benniha. Bi'iniha nna anca biabinbi bixxudi xeni rinnabiaha, larcala nna uta'ababi len Jesús leli'ia gue yo'o gue bixxudiha. <sup>16</sup> Ttiaca Betu nna niaba be'eanbi, juera ro'o puertaba dubi. De nuala nna nuarca bequi bi'ini anca biani bixxudiha unne lenbi nuila du ridhali puertaha qui ga'a benni, ugüelhana ga'a Betu. <sup>17</sup> Nuila du ro'o puertaha nna unnaba tisana rana Betu:

—¿Si läba lu lhe ancagualu ttu ca nu rudheti nu rule'e unbiyú-na?

Labi nna becabibi rabi:

—Dica. Laga anca neti nu rudheti nu rule'e unná.

<sup>18</sup> De da idilha nna, ca nu ribeni sina gue bixxudiha lencana ca güen sina gue yotuha nna beon ttebacana gui, use'e ttebacana gaxxaba ro'o guiha rotsa'acana. Betu nna niaguaba dubi len ca nua rotsa'abi ro'o teha.

### Anás rinnaba tisana Jesús

19 Bixxudi xeni rinnabiaha nna unnaba tisana Jesús gue ca tisa rule'e<sub>ḡ</sub> lhe guetu ca bi'ini rudheti nu rule'e<sub>ḡ</sub> lhe. 20 Jesús nna becabi<sub>ḡ</sub> gueni reḡ na:

—Neti nna aní lo iyába benni unne neti, satiaba udúa bele'etia ca benni quia anca benni israelita-na atta ritupacana leli'ia gue yotu-na lhe lhe'e ca yo'o atta rudheticana ca tisa gue Tata Dios lhe. Larcala nna laga bi unne neti ttu bixa atta gatsi. 21 ¿Biacā neti la rinnaba tialu? Na unnaba tisa ca nu bienquinna nu ria. Lacana innácana bixa rpea cana. Ca unná yucana bixa ria.

22 Atti ra Jesús anía nna, ttu ca güen sina gue yotuha du nia nna ulea ttebana gui ro'o benniha nianna ranḡ:

—¿Si aná dica ecabilu gue benni anca bixxudi xeni rinnabia-na?

23 Jesús nna reḡ na:

—Gansi unnea nu lä anca tse nna, gus neti ¿bi nu bittu anca tse unnea? Gansi unneba<sub>ḡ</sub> nu anca tse nna, ¿biacala neti begüelu?

24 Laniala nna unnabia Anás bexxicacana benniha atti udhelhanḡ lo Caifás nu anca bixxudi xeni rinnabiaha.

### Attu libe bittu ridí ro'o Betu anca bienbi Jesús

25 Betu nna niaba sna dubabi ro'o teha rotsa'abi. Ca nu se'e nia nna rácan bi:

—¿Si läba lu lhe ancalu ttu ca nu rudheti nu rule'e unbiyú-na?

Labi nna laga uxí ro'obi, rálabi:

—Dica. Laga anca neti nu rudheti nu rule'e unná.

26 Ttu ca nu ribeni sina gue bixxudi xeni rinnabiaha, nu da tiana unbiyuu uchú Betu naganiha nna ran bi:

—Inqui niaba bilátia lu du lenlu unná atta da ca ya olivuha nna.

27 Betu nna bittu uxí ro'obi attu libe gansi gualí anca bienbi Jesús. Lora lania tteba nna uxxá ro'o berudiha.

### Uhecana Jesús guadúcanḡ lo Pilatu nu bodú ca nu rinnabia gue Roma

28 Ca nu bedaxxucana Jesús nna udá tteba lencanḡ lhe'e yo'o gue Caifás, dia lencanḡ lhe'e yo'o lagüiha. De chi da

tsaniha nna nuarca bitturu uta'acana lhe'e yo'o lagüiha cumu lacana racaquinna itsigacana lo Tata Dios gansi ga'acana atta se'e ca benni bittu anca benni israelita. Lania nna larga aca gocana rse gue laní pascua atti rado attu ida bodilá Tata Dios ca benniola guetuha lo ná ca nu Egiptuha. <sup>29</sup> De nuala nna biría Pilatu rana cana:

—¿Bi lo ni'ia gue rudelhiyyale unbiyuu-ni?

<sup>30</sup> Lacana nna becabicana rácan na:

—Ttirca bittuba beni unnii ttu nu lä anca tse nna, laga ita ri'itu ettetéu unnii las nálu.

<sup>31</sup> Pilatu nna ran cana:

—Lebi'iba gualche na, gualuni elha uxtisi gueni attiba ra lo ca tisa rinnabia guele-na.

Lacana nna rácana:

—Ri'itu nna laga bi ga'ana uttitu nuxa benni.

<sup>32</sup> Aníaliba nna guaxxína ca tisa unne Jesús gue gaxasná gattie.

<sup>33</sup> Laniala nna beta'a Pilatu lhe'e yo'o lagüiha attu libe, ux ttebana Jesús, nianna rana benniha:

—¿Si lu ancalu nu innabia gue ca benni israelita-na?

<sup>34</sup> Jesús nna becabie reę na:

—¿Si nu anca guelunni rinnelu aca, nuxaba attu nu subi utixxi'ienna lu nu anca quia aca?

<sup>35</sup> Pilatu nna becabina ranę:

—¿Nnari benni israelita neti? Ca benni guelha ba lencana ca nu lo gue ca bixxudi-n ba bettelhu'ucan lu las náya. ¿Bi benlu?

<sup>36</sup> Jesús nna becabie reę:

—Elha rinnabia quia-ni nna, laga ancunni gue yies lo yu-ni. Ttirca ancana gue yies lo yu-ni nna, ca benni rudheti nu rule'ea-na nna bitilhabacana qui bittu bedaxxu ca benni quia ca nu israelita-na neti. Ttiaca elha rinnabia quia-ni nna laga ancunni gue nii.

<sup>37</sup> Laniala nna ra Pilatuha benniha:

—Anla lu ancalu nu rinnabia ganna.

Jesús nna reę na:

—Luba chi ralu, neti anę nu rinnabia. De nuala nna ulia, delhā yies lo yu-ni qui quixxi'iaya nu anca gualí. Iyába ca nu runi nu anca gualí nna, rudo nagacani gue nu ria.

<sup>38</sup> Pilatu nna ranę:

—¿Bi nua nu anca gualí?

### Boquinna iqui ca nu israelita gatti Jesús

Dequi de atti ra Pilatuha anía nna, biría ttebana diana güenne len ca nu lo gue ca benni quia ca nu israelita attu libe, nianna ran ca nua:

—Tsa bittu ratti'iaya bixa lo ni'ia gue rudelha iyyale unnii.  
 39 Lebi'i nna labile neti nna rodiláya ttu nu te lisiyya laní pascua atti rado attu ida bodilá Tata Dios ca benniola gueleha lo ná ca nu Egiptuha. ¿Si gua rdacale odiláya nu rinnabia guele-ni, lebi'i benni israelita?


40 Iyábacana bedebesi'iacana attu libe rácana:

—¡Unná bittu! ¡Barrabás nna ba bebea lisiyya!

Barrabás nna ancana nu runi ubana.

**19** <sup>1</sup> Laniala nna beni Pilatu mandadu bedaxxucana Jesús qui quincana benniha. <sup>2</sup> Ca suldaduha nna bencana ttu corona len ya sitsi ulu'ucana nua iquie, atti begucu ttebacane ttu lari muradu. <sup>3</sup> Nianna ubiga ttebacana atta due rácane:

—¡Xxeni ra lelu, lu nu rinnabia gue ca benni israelita!



Atti ralhi ttebacana gui loe.

4 Pilatu nna bederia ttebana attu libe lhe'e yo'o lagüiha, nianna ran ca benni quia ca nu israelita:

—Gualgüiarga. Ni na chea. Ni udúa na lole attu libe qui ugüiale nna neti nna tsa laga ratti'iaya bixa beni unná qui gattina.

5 Biria tteba Jesús yu'u iquie corona anca len sitsiha, nucue lari muraduha lhe. Pilatu nna ran cana:

—Ni benniha du ni.

6 Atti bilani ca nu lo gue ca bixxudiha lencana ca güen sina gue yotuha nna, uresi'ia ttebacana rácana:

—¡Betá na lo ya crusi! ¡Betá na lo ya crusi!

Pilatu nna ran cana:

—Naba gualeche na. Lebi'iba gualutá na lo ya crusi, cumu neti nna tsa laga ratti'iaya bixa nu lä anca tse beni unná.

7 Ca benni quia ca nu israelita nna becabicana rácana:

—Ri'itu nna te ttu tisa rinnabia guetu. Lo tisa rinnabiaha nna ra: Labiaba gatti unná cumu de rana ancana xi'ini Tata Dios.

8 Atti bienini Pilatu rácana anía nna adílaba usinna. 9 Beta'a ttebana attu libe lhe'e yo'o lagüiha, nianna rana Jesús:

—¿Ga ladu beaca laslu?

Ttiaca lee nna tsa laga becabie gueni. 10 Pilatu nna ran:

—¿Neti unná rinnea nna lä recabilu quia? ¿Si bittuba yulu dequi neti nna te derechu quia odiláya lu, o si utáya lu lo ya crusi?

11 Laniala nna becabi Jesús ree na:

—Ttirca bittuba beni Tata Dios acalu uxtisi nna laga aca guelu innabialu bixa udhacacana neti. Larcala nna nu betena neti las nálu nna ancana nu nujar yua gue nu lä anca tse benna atti lu.

12 La lania tteba nna udulo Pilatu reguila leni gaxasná unna qui odilána Jesús, ttiaca ca benni quia ca nu israelita nna ribesi'ia nicana rácan na:

—¡Lu nna laga ancalu benni do tse leni César nu rinnabia Roma gansi unná odilálu! ¡Iyába nu runi ancana nu rinnabia nna, nu lä raca uyúna César ba nua!

13 Dequi de bina Pilatu nu ra ca nua nna, ulea ttebana Jesús. Lana nna udo ttebana lo xxila atta ridona runna elha uxtisiha. Atta runna elha uxtisiha nua te lani Atta Yu'u Iyya.

Leni tisa hebreo nna te lani Gabata. 14 La sá nua anca bispri laní te lani pascua atti rado attu ida bodilá Tata Dios ca benniola guetuha lo ná ca nu Egiptuha. Attiba tu sagüe bisa nna Pilatu nna rana ca benni quia ca nu israelita:

—¡Ni nu rinnabia gueleha du ni!

15 Ttiaca lacana nna uresi'ia ttebacana rácana:

—¡Betti unná! ¡Betti unná! ¡Betonna lo ya crusi!

Pilatu nna unnaba tisan cana ran cana:

—¿Si utáya nu rinnabia guele-ni lo ya crusi?

Ca nu lo gue ca bixxudiha nna becabicana rácana:

—Ri'itu nna suna César ba anca nu rinnabia guetu.

16 Nioca nna bote Pilatuha benniha las nácani qui utácane lo ya crusi. Lacana nna beche ttebacane.

### Betácana Jesús lo ya crusi

17 Jesús nna nujabe ya crusi gueha birie lhe'e yiesiha die atta rácana Lo Lhilhi Ancana Attiba Bega Iqui Nu Yatti. Leni tisa hebreo nna lana Gólgota. 18 Nia betácane lo ya crusi lenie a chupa ca unbiyuu. Ladu laduba ya crusi gue Jesús betácana ca unnua lo ya crusi gue ttuttucana. 19 Pilatu nna benna mandadu bencana letra lo ttu breta betácana xequie. Lo nua nna ra: “Jesús gue Nazaret, nu anca nu rinnabia Israel-na.” 20 Ixeru ca benni quia ca nu israelita belabacana nu ra lo bretaha, cumu gaxxaba ro'o yiesi Jerusalén nua atta betácana Jesús lo ya crusiha. Letraha nna ancana leni tisa hebreo lhe latín lhe griegu lhe. 21 Larcala nna ca nu lo gue ca bixxudi gue ca benni quia ca nu israelita nna rácana Pilatuha:

—Bittu unlu lo breta-na: “Nu rinnabia Israel-na.” Benla: “Nu rana dequi lana ancana nu rinnabia Israel-na.”

22 Ttiaca Pilatu nna becabina rana:

—Nu chi benia nna tsaba chi benia nua.

23 Dequi de betá ca suldaduha Jesús lo ya crusiha nna, bodaxxu ttebacana ca xo benniha bencana ttpa lila'a, ttuttu nua gue ttuttu ca suldaduha. Bodaxxu guabacana lari radi benniha. Unnua nna laga bi tiyya ro'o loes nua, ttuba anca itú nua, desdeba liree axtaba güetsaa yaba nua. 24 Ca suldaduha nna ra loescani:

—Bittu ichedari unná. Unbari gaxasná qui tte denri nuxari ralhari unná.

Aníliba nna guaxxína nu ra ca tisa dia lo ca sitsi gue Tata Dios atta ra: “Ulha'abacana ca xun quiaha, beguila lecani qui ute daquinna nuxcana be'ean lencana lari radiaha lhe.”

25 Aníaba ben ca suldaduha.

Gaxxaba xana ya crusi atta ta Jesús du nan guęha, xila nan guęha lhe María bi'ini do leni Cleofas lhe María Magdalena lhe. 26 Atti bilani Jesús nan guęha dubi gaxxaba atta dua, neti benni rudheti nu rule'e, benni raca xxattanie gueni, lee nna ra ttebe nan guęha:

—Nuila, ni xi'inlu du na.

27 Lenla nna reę neti:

—Ni nan guelu du na.

Lania tteba nna bechea nan guęha qui dhobi lhe'e yo'o quiaha.

### Aní bedhacacana Jesús atti chi deoba gattie

28 Dequi de nua nna Jesús chiba yu xeabe chiba benie iyába nu ga'ana unie. Qui saxxína aca nu ra lo ca sitsi gue Tata Dios nna lee nna reę:

—Rebisia inda.

29 Nia du ttu canti sa tittina vinu idí. Ca nu se'e nia ulu'u ttebacana ttu xunu lhe'e vinuha qui ibidhana, nianna bedocana nua lo ttu nu anca attiba yittixtila te lani isopu, atti besigacana nua ro'oe. 30 Dequi de bennixxie nua nna ra ttebe:

—Ni uluxa iyá nu ga'ana unia.

Nianna bedetta tteba iquie, utti ttebe.

31 La sá nna ancana bispri gue pascua atti rado ida bodilá Tata Dios ca benniola guetuha lo ná ca nu Egiptuha. Ca nu lo guetu nna bittu raca lecani eya'ana ca benni yatti lo ya crusi sá redí letu, cumu la sá nna ancana ttu sá xeni guetu. De nuala nna unnabacana lo Pilatuha unna mandadu quitsacana ca ni'ia ca benni ta lo ya crusiha qui yuba gatti ca nua qui tua ca nua nia. 32 Ca suldaduha nna güia ttebacana guattitsacana ni'ia nu ta lo ya crusi primeruha, anáguaba ni'ia attu nu ta lo ya crusi daca attu ladu gue Jesús. 33 Ttiaca atti ubigacana atta ta Jesús nna, biláquinna chiba utti benniha. Larcala nna bittu utitsacana ni'ia benniha. 34 Ttu ca suldaduha nna bega'a ttebana nu do iyya ttutsi loni dennaha uxtil gue benniha. Atta uta'a nua nna biría tteba inda lhe reni lhe. 35 Neti bi'ini rixxi'ia unní nna anca benni bilani nu uca. Nu gualíba rinnea. Gua yuba nna nu gualíba

rixxi'iaaya qui anáchu nna lebi'i nna tsia lele. <sup>36</sup> Anába uca qui guaxxína nu ra lo ca sitsi gue Tata Dios atta ra: “Ni ttu sitta gue benniha bittu quitsacana.” <sup>37</sup> Ráguaba attu re lo ca sitsi-na: “Ugüiacana benni bega'acana nu do iyya ttutsi loni cuitteha.”

### Jesús bigatsie

<sup>38</sup> Dequi de lania nna Gusé bi'ini beaca lasbi yiesi lá Arimatea nna unnababi leni Pilatu ugüelhana echebi cuerpu gue Jesús. Gusé nna sigába ucabi benni bedheti nu bele'e Jesús, cumu de usinbi lo ca nu lo gue ca benni quia ca nu israelita. Pilatu nna ucaba leni. Gusé nna güia ttebana guaxína cuerpu gue benniha. <sup>39</sup> Anáguaba Nicodemu nu güiana ttu lo rela guanne lena Jesús bisinguana leni attiba rerua (30) kilu nu rure xixxi gue ttu yaga güexxa te lani mirra chixxina nu rure xixxi rute ttu ya ga'a te lani áloe. <sup>40</sup> Gusé lenbi Nicodemu nna bedaxxucana cuerpu gue Jesús bottubicanę lari leni nu rure xixxiha. Benbacana attiba labiba ca benni quia ca nu israelita runcana gansi chi rucatsitu ttu benni yatti. <sup>41</sup> Gaxxaba atta betácana Jesús lo ya crusiha nna te ttu lo yu da ca ya xixxi lhe'eni. Lhe'e nua nna do ttu baa cubi nu bittu chi bigatsi ni ttu benni lhe'eni. <sup>42</sup> Nia becatsicana Jesús, cumu de te baa gaxxa, de chiguaba ga'a sá redí le ca benni quia ca nu israelita lhe.

### Jesús nna beacanie

**20** <sup>1</sup> Dumincu, primerba sá bedú ni'ia xumanu, dilto chiga sna ancarla chulha güia María Magdalena atta te baa gue Jesús. Bilá ttebinbi chi bitua iyya yaya ro'lo baa. <sup>2</sup> Laniála nna begá ttebabí deyyabi atta do Simoni bi'ini láguaba Betu lenbi neti benni raca xxattani Jesús gueni. Nianna rabi ri'itu:

—¡Bebeabacana Benni Bananie ri'i lhe'e baha! ¡Bittu yutu gaxa ladu guadha'ancanę!

<sup>3</sup> Biria tteba lenia Betu, diatu atta te baha. <sup>4</sup> Irupabatu ruxunnitu diatu, ttiaca neti nna bigárúa atti Betu. Nuarca lo neti bisinağatta te baa. <sup>5</sup> Biachu ttebağbecá loa lhi'iu, niaba bilátia ca lari bitesi Jesús, ttiaca bittu uta'aya. <sup>6</sup> Dequila nna bisia Simoni bi'ini láguaba Betu. Bi'iniha nna uta'a ttebabí lhi'iu. Bilágüinbi ca lari bitesi benniha se'ecana nia. <sup>7</sup> Lari bottesicana iqui benniha nna laga re nua leni adí ca lariha, atta subila lhatsi tte yapa nua rena. <sup>8</sup> Laniála uta'aya, neti benni bisina primeru atta te baha. Bilábatia lhe'e baa nna

güia tteba lasia. <sup>9</sup> Cumu laga chi guadú letu nu ra lo ca sitsi gue Tata Dios, Jesús nna labiaba eyaquin benniha qui erie lhe'e baa atta yu'u ca nu yatti-na. <sup>10</sup> Ri'itu nna güequi ttebatu deyyatu atta re'eantuha.

### Jesús bele'en loe María Magdalena

<sup>11</sup> María nna niaba dubi ro'o baa ribesbi. Laca dubi rbesbiha nna biachu ttebabi becá lobi begüiabi lhe'e baa. <sup>12</sup> Nia bilenbi chupa ingeli nucu xo sitsi guecabi. Ttubi dobi daca xequi atta utta Jesús, attúbi nna dobi daca xani'ia atta utta benniha. <sup>13</sup> Ca ingeliha nna unnaba tisacabi rácabi:

—Nuila du na, ¿biaca ribeslu?

Labi nna becabibi rabi:

—Cumu dechebacana Benni Bananie neti. Neti nna bittu yua gaxa guaca'ancane.

<sup>14</sup> Unnua ba rabi nna bodequi tteba lobi daca cue'ebi, bilá ttebinbi Jesús niaba due, ttiaca laga yubi gansi benniha nua.

<sup>15</sup> Jesús nna unnaba tise reę bi'iniha:

—Nuila du na, ¿biaca ribeslu? ¿Nú reguilalu?

Labi nna uquinbi ga nu rapa lo yu atta da ca ya xixxiha ba nua, nuarca rabi:

—Tata, gansi luba dechelu benniha nna, utixxi'ien neti gaxa guaca'anlu benniha qui tsiaya saxíe.

<sup>16</sup> Jesús nna reę bi'iniha:

—¡María!

Labi nna bodequi tteba lobi, unnebi tisa arameo rabi:

—¡Rabuni!

Tisa-ni nna dienna innána Maestru. <sup>17</sup> Jesús nna reę bi'iniha:

—Bittu udaxxulu neti, cumu laga chi beopia atta do Tata quia. Beyyala guattixxi'ien ca betsi to quia chi deya'aya atta do Tata quia, benni ancaguaba Tata guele. Lee anque Dios quia, benni ancaguaba Dios guele.

<sup>18</sup> Laniala nna deyya María Magdalena qui quixxi'ienbi ri'itu ca bi'ini rudheti nu rule'e Jesús, labi nna chi bilenbi benniha, quixxi'iaguabi iyába nu ra benniha bi lhe.

**Jesús uca xxe lhe'e yo'o atta se'e ca bi'ini rudheti nu rule'e**

<sup>19</sup> Atti chi da raca ela la sá dumincu tteba, sá redú ni'ia xumanu, ri'itu ca bi'ini rudheti nu rule'e Jesús nna yayabintu

puerta gue yo'o atta bitupatuha, cumu rasintu ca nu lo gue ca benni guetu ca nu israelita. Jesús nna uca xxē udúe salhe guetu, nianna reę ri'itu:

—¡Lhatsi toru gualtse'e!

20 Dequi de reę anía nna bele'e ttebanie ri'itu ca ne lhe uxtil gue lhe. Ri'itu nna be'eo juisia letu bilentu benniha.

21 Jesús nna reę ri'itu attu libe:

—Lhatsi toru gualtse'e. Attiba udhelha Tata quia neti, aníaguaba idhelha lebi'i.

22 Unnua ba reę nna belubi ttebe, nianna reę:

—Gualdhí Espiritu gue Tata Dios. 23 Ca benni gale gua teba elha xen lasi gue nu lä anca tse runcana nna gua teba elha xen lasi guecani. Ca benni innále bittu elha xen lasi guecani te nna bittuguaba elha xen lasi te gue ca nua.

### **Bittu ria le Maxi dequi gualí beacani Jesús**

24 Maxi bi'ini teguaba lábi nu Cuachi, labi nna selaguabi ri'itu ca bi'ini rudheti ca tisa rule'e Jesús. Laga nubi te atti bele'en lo Jesús adítu. 25 Lenla nna ratu bi:

—Chi bilentu Benni Bananie ri'i.

Ttiaca Maxi nna becabibi rabi:

—Gansi bittuba ilátia las ne anca güee gue ca clavuha nna uga'a xbináya atta uta'a ca clavuha lhe lhe'e belea bedocana lhe'e uxtil gue lhe, laga tsia las neti.

26 Dequi de ute xxunu ubisa nna ri'itu ca bi'ini rudheti nu rule'e Jesús nna bedetupatu attu libe lhe'e ttu yo'o. Laniarguaba nna niaba du Maxi len ri'itu. Ri'itu nna yayabintu yo'oha. Jesús nna uca xxe ttebe lhe'e yo'oha udúe salhe guetu. Nianna reę ri'itu:

—¡Lhatsi toru gualtse'e!

27 Lee nna ra ttebe Maxi:

—Bedo xbinálu nii. Begüiatte ca naya-ni lhe besiga nálu nna bega'a na lhe'e belea do lhe'e uxtil quia-ni. Bittu acalu nu lä ria leni. Uca benni ria leni.

28 Maxi nna becabibi rabi:

—¡Lu ancalu Benni Bananie neti lhe Tata Dios quia lhe!

29 Jesús nna reę bi'iniha:

—¿Si de bilenlu neti nna ria lelu? ¡Carbáru ca benni bittu biláquinna, ria lecani nna!

### Bi lo ni'ia gue beni Juan lo sitsi-ni

30 Ixeru adí ca milagru beni Jesús aní lo ri'itu ca bi'ini rudheti nu rule'e. Ca benniha nna laga bi diaque lo sitsi-ni.  
31 Ca ben-ni nna ucaque lo sitsi qui anáchu lebi'i nna tsia lele, Jesús anque Cristu benni chi ga'anani Tata Dios odileg ca benni, anque Xi'ini Tata Dios lhe. De tsia lele nu ree nna gatta elha nabani guele iyyabáha ttu dia lii.

### Jesús bodile'en loe a gasi ca bi'ini rudheti nu rule'e

**21** 1 Dequi de lania nna bodile'en loen Jesús attu libe ri'itu ca bi'ini rudheti nu rule'e ro'o indatoo gue Tiberias. Aní uca bele'en loe ri'itu: 2 Simoni bi'ini láguaba Betu lhe Maxi bi'ini te labi Cuachiha lhe Natanael gue yiesi Caná re lo yu te lani Galilea lhe, ca xi'ini Zebedeo, delába neti leni attu betsia lhe a chupa ca bi'ini sela len ri'itu rudheti nu rule'e Jesús lhe ttu reba nia se'etu. 3 Simoni bi'ini láguaba Betu nna rabi ri'itu:

—Tsiaya güedaxxu belha.

Ri'itu nna becabitú ratu:

—Dhaba ri'itu len luu.

Laniala nna diatu, gopi ttebatu lo ttu barcu; ttiaca la ela nna tsa bittu biexxuintu ni ttu belha. 4 Atti chi da raniha nna uca xxe tteba Jesús ro'o indatooaha. Ri'itu ca bi'ini rudheti nu rule'e nna ni lä yutu ganna benniha ba nua. 5 Jesús nna unnaba tise ree ri'itu:

—Uncuiti, ¿si biexxuinle belha?

Ri'itu nna becabitú ratu:

—Nuttu biexxuintu.

6 Jesús nna ree ri'itu:

—Gualudelha yexxa guele-na daca ladu derechu gue barcu-na, uyúrgale bi güiyaxxubinle belha.

Aníaba bentu. Dequila nna ganua riedhintu yexxaha ebeatu na lhe'e inda de deyu'u xxatta belha lhe'eni. 7 Neti, benni raca xxattani Jesús gueniha nna rpea Betu:

—¡Benni Bananie riha ba ben-na!

Atti bienini Simoni bi'ini láguaba Betu dequi Benni Bananie ri'ituha ba benniha nna, beocu tteba xobi cumu riaba xobi, nianna uta'a ttebabi lhe'e inda. 8 Adítu nna deyya lentu barcuha qui eriatu ro'o indatooaha, dena'ayatu yexxaha sa tina belha,



cumu a sunruba attiba attu gayua (100) metru reasa esintu  
atta da ro'o inda. <sup>9</sup> Atti besintu ro'o indaha nna bilá ttebintu  
ttu gui yali re nia. Lo guiha nna xua ttu belha, chiguaba te  
ttaxtila lhe. <sup>10</sup> Jesús nna reę ri'itu:

—Gualsaxxi ttu chupa ca belha chi guadaxxubale-na.

<sup>11</sup> Simoni bi'ini láguaba Betu nna gopi ttebabi lo barcuha,  
bebe na'aya ttebabi yexxaha bebeabi na ro'o indaha desá tina  
belha elha. Ttu gayua bixxi medi gayua yu'u tsunna (153)  
belha deyu'u lhe'e nua. Delo ttoniali nua deyu'u lhe'e yexxaha  
nna tsa laga bise'e lo nua. <sup>12</sup> Jesús nna reę ri'itu:

—Gualtá, gualgo.

Niba ttutu bittu reaxintu innaba tísatu gatu benniha:  
“¿Núleonni?” cumu yubatu Benni Bananie ri'ituha ba benniha.  
<sup>13</sup> Jesús nna ubiga ttebeę bedaxxue ttaxtilaha beteę len ri'itu,  
aníaguaba benie len ca belhaha. <sup>14</sup> Lania beyonna libe rule'en  
loe ri'itu ca bi'ini rudheti nu rule'ę, dequi de beacanie berie  
lhe'e baa atta yu'u ca nu yatti-na.

### **Jesús rulise Betu qui uyúbi ca benni ria lecani benniha**

<sup>15</sup> Dequi de chi uluxa utotu nna, ra tteba Jesús Simoni  
bi'ini láguaba Betu:

—Simoni xi'ini Jonás, ¿si racaruinlu quia atti ca nu se'e ni?  
Betu nna becabibi rabi:

—Bila. Lu nna gua yu xeabalu, xa tata, neti nna gua  
racabatia guelu.

Jesús nna ree bi'iniha:

—Biyú ca carne'e quia-na ganna.

16 Bedequi dacabe ree bi'iniha attu libe:

—Simoni xi'ini Jonás, ¿si gua raquinlu quia?

Betu nna becabibi rabi:

—Bila. Lu nna gua yubalu, xa tata, neti nna gua racabatia guelu.

Jesús nna ree bi'iniha:

—Biyú ca carne'e quia-na ganna.

17 Nu beyonna libe ree bi'iniha:

—Simoni xi'ini Jonás, ¿si gua raquinlu quia?

Betu nna si'irurba benbi lania, cumu nia beyonna libe ra benniha bi, ¿si gua raquinlu quia?

Laniala nna rabi benniha:

—Lu nna iyába yulu, xa tata. Gua yu xeabalu neti nna gua racabatia guelu.

Jesús nna ree bi'iniha:

—Biyú ca carne'e quia-na ganna. 18 Neti gualíbatia rpea lu, atti ancalu cuitiha nna ttubalu reocu xolu, riabalu attaba racaba lelu. Ttiaca gansi chi ucalu benniola nna ulhíba nálu qui ugucu nu subi xolu. Unnua nna ichen lu tsia lenna lu atta bittu raca lelu tsialu.

19 Aníaba ra Jesús, rixxi'ie gaxasná gatti Betu. Leni elhutti guebiha nna unbi ule'e lo anca Tata Dios benni ra xxeni leg. Lenla nna ree bi'iniha:

—Utá, bettenalha neti.

### Bi'in-ni nua uca xxattani Jesús guebi

20 Atti bodequi lo Betu nna bilenbi denoa, neti benni raca xxattani Jesús quia, neti guaba nua udoa cuitte atti uto rsetuha. Neti nua unnaba tisa Jesús rpe: “Tata, ¿núna uten lu las ná ca nu uttican lu?” 21 Atti bilani Betu neti nna, unnaba tisa ttebabí Jesús rabi benniha:

—Tata, unní nna ¿bila sateonni?

22 Jesús nna becabie ree bi'iniha:

—Gansi aca lasia nna anába na dona axtaliba esíaya, lu nna ¿bi elha ralhalu rinnaba tialu? Lu nna utába betteno neti.

23 Anía uca nna nuarca biría tisa bina adí ca benni ria le Jesús dequi neti nna bittu gattia. Ttiaca Jesús nna laga ree Betu dequi neti nna bittu gattia. Rabe bi'iniha “Gansi aca lasia

nna, anába na dona axtaliba esíaya, lu nna ¿bi elha ralhalu rinnaba tialu?”

### **Ni lhuxa ca tisa beni Juan lo sitsi**

24 Neti bi'ini bedheti nu bele'e Jesús rixxi'iaya iyába unní, benia ca tisa-ni lo sitsi lhe. Lebi'i nna gua yubale, neti nna rixxi'iaya nu anca gualí.

25 Jesús nna ixeru nu beni benniha. Gansi tsia ttuttu ca nu beni benniha lo sitsi nna, neti nna racatia, gax laga aca ni yies lo yu-ni atta tsu'u ca sitsi aca locani gue iyá nu benie.